



8-pela pes saplimen bilong NAQIA i stap insait - P 7,8,9,10,19,20,21 na 22



4pes Saplimen

Opim bilong nupela plaza bilong Nambawan Supa - P13,14,15 na 16



UPNG laik statim skul gen

PRAIM Minista Peter O'Neill i laikim Yunivesiti ov Papua Niugini (UPNG) long statim gen skul yia bilong 2016.

Mista O'Neill i toktok pinis wantaim nupela Haia Edukesen, Sains, Risets na Teknoloji Minista, Francis Marus wantaim Vais-Sensela bilong UPNG, Profesa Albert Mellam na ekting Sensela, Dokta Nicholas Mann long opim gen skul yia bilong 2016.

UPNG akademik senet i bin tokim UPNG kaunsil long pasim skul long Julai 5, na kaunsil i bin stopim skul bikos ples i no bin stap orait long larim ol leksera na sumatin i stap gut na skul.

Dispela i bin lukim ol sumatin i go bek long ples na skul i pas, tasol gavman i laik opim gen skul long mun Septemba bikos planti sumatin i laik kam bek gen na pinisim skul.

"Planti sumatin i laik kam bek na pinisim skul. Wan wan sumatin tasol i wok long bagarapim skul bilong arapela ol sumatin husat i laik skul na kisim save," Mista O'Neill i tok.

Mista O'Neill i tok i gat sampela ol toktok gavman wan-

taim yunivesiti kaunsil i mas mekim long larim ol sumatin i kam bek gen long skul.

"Sapos olgeta toktok i go het gut, gavman i stap redi long helpim ol sumatin i kam bek na statim gen skul," Mista O'Neill i tok.

Mista O'Neill i tok Yunivesiti ov Goroka (UoG) na PNG Yunivesiti ov Teknoloji (Unitech) bai statim gen skul yia bilong 2016 na em i tok gavman i stap redi long helpim ol.

Mista O'Neill i tok klia olsem ol sumatin husat i laik kam bek gen long skul i no ken mekim protes.

"Sapos ol i laik skul gen, mipela i les long ol i stopim skul na mekim kain kain pasin nogut. Ol i mas wanbel na kam bek gen long pinisim skul bilong ol, kisim save na go aut long wok," Mista O'Neill i tok.

Mista O'Neill i tok ol sumatin i no ken westim taim na kam bek gen long skul long stap nating na bihainim laik bilong wanwan long kamapim protes na bagarapim propeti bilong gavman na yunivesiti.

"Planti sumatin bai pinisim gret 12 na kam aut neks yia.

Mipela i laikim ol dispela sumatin i gat sans long kisim yunivesiti edukesen," Mista O'Neill i tok.

UPNG kaunsil i tok ol i wok long senisim kalenda bilong skul na mekim ol samting long larim ol sumatin i kam bek na statim skul long mun Septemba long dispela yia.

Dokta Mann i tok neks yia bai gat tripela semesta na dispela yia bai gat wanpela semesta tasol.

"Mipela i wok long senisim akademik kalenda long larim ol sumatin i kam bek gen long kempas long mun Septemba.

"Dispela yia bai gat wanpela semesta tasol. Ol sumatin i no pinisim gut skul long semesta wan. Olsem na bai mipela i skruim semesta bilong dispela yia i go moa, na brukim neks yia i kamap tripela semesta," Dokta Mann i tok.

Waigani Kempas i stap isi tru na wan wan kar bilong ol leksera na wok manmeri tasol i wok long go kam long skul.

Skul i pas yet, na ol sekyuriti gad bilong Guard Dog na Uniforce i lukautim kempas i stap.



NUPELA DELOITTE HAUS: Siaman bilong Nambawan Super, Anthony Smare, wantaim ol Bod Memba na ol nupela na olpela memba bilong Nambawan Super i sanap long fran bilong nupela opis bilong ol. Dispela nupela Nambawan Supa bilding nau bai kamap Deloitte Haus. Poto Nicky Bernard.

\$pes saplimen i stap long pes 13, 14, 15, na 16.

JINGLE COMPETITION
Win K20,000
worth of Music & Sporting equipment for your school

Get together with your school mates and write a 30 second Meadow Fresh jingle.

Full competition details available in a store near you.

Papamama mas baim balus tiket bilong sumatin

ENGA Gavana Sir Peter Ipatas i askim ol papamama long sapotim ol sumatin bilong bikpela yunivesiti bilong kantri.

Taim nupela Minsta bilong Hai Edukesen, Risets, Sains na Teknoloji, Francis Marus, i tok aut long opim gen Yunivesiti ov Papua Niugini (UPNG) na larim ol sumatin i kam bek gen long skul, Sir Peter i bin wanbel tru long dispela toktok bilong Mista Marus wantaim ol kaunsil memba bilong UPNG long opim gen 2016



Enga Gavana Sir Peter Ipatas

akademik yia.

Sir Peter i tok tenkyu long gavman i lukluk long opim gen 2016 skul yia bilong UPNG, na i singaut i go long ol papamama long helpim ol pikinini bilong ol long

kambek gen na skul.

Em i laikim ol papamama long baim balus tiket bilong ol pikinini bilong ol husat i skul long UPNG.

“Mi laik tok tenkyu long gavman i laik sevim akademik yia bilong UPNG. Mi laik askim ol papamama tu long helpim ol pikinini wantaim balus tiket,” Sir Peter i tok.

Sir Peter i tok Enga Provinsal Gavman i no gat inap mani long baim balus tiket bilong ol sumatin bilong Enga husat i skul long UPNG.

Em i tok Enga gav-

man i yusim olgeta mani long arapela ol projek, na em bai hat long ol i baim balus tiket bilong

“Mipela bai baim skul fi bilong ol pikinini taim ol i kambek gen long skul. Fri edukesen sab-sidi bilong ol i stap redi long helpim ol i kambek gen long skul na kisim save.

“Tasol provinsal gavman i yusim pinis mani long arapela ol projek. Na mi laik askim papamama long sapotim mipela na helpim ol pikinini wantaim balus tiket,” Sir Peter i tok.

Ol i pasim 2017 Ileksen

Tony Sapan i raitim

OL lain insait long Bogenvil em ol i wet yet long kisim pe long helpim 2012 ileksen bai i pasim wanem ilektoret komisen i mekim long ranim 2017 Nesenel Ileksen long ailan sapos ol i no baim ol dinau bilong ol long dis-

pela wok bipo long pinis long dispela yia.

Ol papa bilong ol ges haus na haia kar na Banana Bot na ol narapela em ol i bin givim helpim long Ilektorel komisen long 2012 i pasim tok long mekim olsem sapos Ilektorel Komisen i no baim ol long dispela wok ol i bin wokim pinis.

Man i makim maus bilong ol lain i givim bisnis na papa bilong wanpela ges haus, Mista Leo Soli em i wet yet long kisim K34,000 bilong hap bilong slip na kaikai i tok em i tingting long mekim olsem olgeta lain i gat dispela hevi ol i sapotim na bai ol i bihainim na lukim

olsem ol i no ranim 2017 ileksen long Bogenvil sapos ilektorel komisen i no baim ol.

Mista Soli i tok, olgeta lain i bin givim helpim i lusim bisnis bikos Ilektorel Komisen i no baim ol na ol i bilip ol i mas kisim 8 pesen moa antap long mani ol i dinauim ol long en.

Media Council: No ken paitim na krosim ol nius manmeri

MEDIA Council ov Papua Niugini (MCPNG) i no wanbel long ol sapota bilong Westen Provins Gavana Ati Wobiro i bin krosim na i laik paitim ol nius manmeri na kamera man ausait long Waigani Kot Haus las wik taim kot i salim Mista Wobiro i go long kalabus long Bomana.

Ol nius manmeri bilong Post-Courier, The National na Loop PNG i bin stap insait long banis bilong Waigani Nesenel na Suprim Kot taim ol loya bilong Gavana Wobiro i bin laik long beilim em wantaim arapela tupela man we kot i bin painimaut olsem ol i asua long kisim klostu long K7.06 milien bilong Westen Provinsal Gavman.

Ol sapota bilong Mista Wobiro i bin laik long paitim tupela nius manmeri bilong The National na Loop PNG na sif kamera man bilong Post-Courier, Tarami Legei, taim ol i laik kisim piksa bilong Mista Wobiro, Dokta Modowa Gumoi (ekting Westen Provinsal Edministreta) na Norman May (bosman bilong Fly Care Foundation) taim kar bilong Koreksenel Sevis (CS) i kisim ol i go bek long Bomana.

Tasol ol sekyuriti bilong kot haus i bin helpim ol nius lain na polis tu i bin kam bihain taim ol sapota bilong Mista Wobiro i bin lusim kot haus.

Presiden bilong MCPNG, Alexander

Rheoney, i toktok strong egensim dispela pasin bilong ol pablik long krosim na paitim ol nius manmeri na kam-era man bilong midia.

Mista Rheoney i tok pablik i mas respektim wok bilong ol nius manmeri, taim ol i laik kisim piksa na stori bilong ol lida manmeri olsem Mista Wobiro.

Mista Rheoney i tok wok bilong ol nius manmeri i save kamautim ol hait samting na stil pasin bilong ol lida manmeri long kantri.

Mista Wobiro em i wanpela strongpela lotu man na sios lida bilong Evangelical Church ov PNG (ECPNG). Em i stap gavana yet na em save sanap long pulpiti na autim Tok bilong God.

Hela bai ileksen olsem wanem

LEKTORAL Komisin i no mekim wanpela stret-pela toktok long kliaim tingting bilong ol manmeri long Bai Ileksen bilong nupela gavana bilong Hela Provins.

Taim Anderson Agiru i bin dai long mun Epril long dispela yia, sia bilong gavana bilong Hela Provins i bin stap nating.

Ilektoral Komisin i bin tok long ranim Bai Ileksen bilong Hela Provinsal sia long Julai 27 tasol dispela i no kamap na wanpela biknem lida bilong Hela i kisim Ilektoral Komisin i go long kot.

Lida na bisnisman, Larry Andagali, i kisim Ilektoral Komisin, Praim Minista Peter O'Neill, Nesenel Eksekutiv Kaunsil (NEC) na Polis Komisina Gari Baki i go long kot bikos em i laikim Bai Ileksen i mas kamap hariap.

Mista Andagali i bin pastaim Bod Siaman bilong PNG Power Limited, Deputi Siaman na Dairekta bilong Kumul Petroleum Holdings Limited, na Menesing Dairekta bilong papagraun kampani, Trans

Wonderland Limited.

Em i tok Mama Lo bilong kantri i tok orait long larim Bai Ileksen i kamap tasol em i no wanbel long Ilektoral Komisin i no tok aut stret long ranim bai ileksen na taim i wok long pinis hariap long bungim 2017 Nesenel Ileksen.

Mista Andagali i laikim Ilektoral Komisin i mas ranim dispela Bai Ileksen na larim ol pipel i makim nupela gavana bilong Hela.

Mista Andagali i tok; “Ol pipel i mas gat wanpela lida long provins. Lida bilong mipela Anderson Agiru i dai pinis. Ol pipel i mas makim nupela lida long laik bilong ol long kamap nupela gavana bilong Hela,” Mista Andagali i tok.

“Ilektoral Komisin i mas ranim ileksen hariap. Gavman i mas sapotim wok bilong Ilektoral Komisin. Polis i mas redi long givim sekyuriti,” Mista Andagali i tok.

Ilektoral Komisina Patilias Gamato i tok em bai tokim kot long wanem samting Ilek-

toral Komisin i wok long mekim long ranim Bai Ileksen bilong Hela Provins.

Mista Gamato i tok em i bin bungim Polis Komisina Gari Baki na Sif Seketeri Issac Lupari na ol i toktok long ol samting long kamapim dispela Bai Ileksen.

Long wankain taim, Deputi Praim Minista na Minista bilong Inta-Gavman Rilesens, Sir Leo Dion, i tok em bai tokaut long nupela Gavana bilong Hela long dispela wik Mande.

Sir Dion i tok em i kisim pinis edvais i kam long Stet Solisita long las wik Fraide na i tok em i stap redi long tokaut long husat i gavana bilong Hela Provins.

Sir Dion i mekim dispela toktok taim Mista Andagali i kisim gavman i go long kot long larim Bai Ileksen i kamap hariap.

Dispela toktok bilong Sir Leo i laik kliarim tingting bilong ol manmeri taim Francis Potape (Membra bilong Komo-Margarima) na Philip Undialu (Membra bilong Koroba-Lake Kopiago) i tok tupela wantaim i ekting gavana.



PNG POWER Ltd

MAUNT HAGEN OPIS I OP GEN

PNG Pawa Ltd i laik tok save long ol gutpela klaien na ol kastoma bilong en long Maunt Hagen olsem opis bilong en long Maunt Hagen taun em i op gen.

Ol wok bisnis i stat gen long Mande Ogas 1, 2016.

Yu laik save moa, plis ring long telefon namba: 542 1722 o 542 3414.

Chris Bais
Sif Eksekutiv Opisa.




Oil Search pas wantaim PNG

BIHAIN taim bilong bikpela oil na ges kampani bilong PNG, Oil Search Limited, i pas wantaim bihain taim bilong dispela kantri, Menesing Dairekta Peter Botten i tok.

Mista Botten i autim dispela toktok taim em i tokaut olsem Oil Search i givim K185 milien olsem donesen o helpim long kirapim ol rurel komyuniti insait long kantri we em i gat operesen.

Oil Search bai givim dispela mani long Oil Search Foundation long helpim ol manmeri i stap long ples we Oil Search i gat operesen long en.

Dispela mani mak em bilong narapela faiv yia, stat long yia 2016 i go inap yia 2020.

Hela, Sauten Hailans na Galp em ol provins we Oil Search i gat bisnis bilong em, na dispela mani bai go long kirapim ol haus sik, promotim ol meri long gat gutpela sindaun, promotim edukesen na kirapim Hela Provinsal Haus Sik.

Mista Botten, husat i Bod Siaman bilong Oil Search Foundation na Hela Provinsal Haus Sik, i tok Oil Search i kampani bilong PNG bikos ol i bin rejistaim dispela oil na ges kampani long yia



Peter Botten

1929 long Pot Mosbi na het opis biong en i stap long Pot Mosbi tu.

Planti ol operesen bilong em i stap long PNG oil na ges fil, na i gat sampela ol nupela eksplorasen i kamap long Midel Is.

"Bihain taim bilong Oil Search i pas wataim PNG. Sapos PNG i stap gut, Oil Search tu bai stap gut. Dispela i soim olsem ol isu o samting bilong PNG, em ol isu o samting bilong Oil Search tu," Mista Botten i tok.

Em i tok Oil Search Foundation i save wok wantaim ol asples lain long Hela, Sauten Hailans na Galp Provis.

Dispela em ol provins we bisnis na operesen bilong Oil Search i stap long en.

Nambawan Super opim nupela bilding

BIKPELA supa fan bilong ol pablik sevan long PNG, Nambawan Super, i opim wanpela nupela stori bilding bilong en long Pot Mosbi long las wik Fonde.

Nem bilong dispela nupela stori bilding em i Deloitte Haus. Dispela bilding em i nupela stret na i stailpela 11-stori glas haus ol i wokim long Pot Mosbi we bipo Haus ov Asembli i save sanap.

Siaman bilong bod, Anthony Smare, i tok Nambawan Super em i bikpela institusen we i save menesim ol ritaiamen seavings mani bilong klostu olsem 160,000 manmeri, wantaim total fan aninit long menesmen i sanap olsem K5.2 bilien.

Gavman i gat K2 bilien dinau long Nambawan Super. Dispela em i mani bilong ol pablik sevan husat i pinis long wok gavman.

Mista Smare i tok ol invesmen bilong Nam-



Ol wok manmeri bilong Nambawan Super i amamas long fran bilong nupela Deloitte Haus.

bawan Super long propeti na arapela wei bilong invesmen, i wok long gro i go bikpela.

"Taim Nambawan Super i laik inves long bihain taim, em i save lukluk long putim mani we mipela i ken mekim sampela moa mani bihain long sampela taim," Mista Smare i tok.

Em i tok bod ov dairekta

bilong Nambawan Super i no bin surik long sampela salens bilong ikonomi we PNG i bin bungim long tupela yia i go pinis.

"Sampela yia go pinis, mipela i bin glasim gen wanem kain ol invesmen mipela bai mekim long gutpela bilong bihain taim.

"Mipela i bin lukluk long putim mani i go insait long

ol invesmen we i ken mekim mani, na helpim Nambawan Super long mekim winmani.

"Dispela plen i bin lukim Nambawan Super i stretim gen ol invesmen long propeti.

"Mipela i lukluk long bihain na putim mani i go long ol bikpela propeti. Mipela i salim ol liklik propeti o haus na kisim mani," Mista Smare i tok.

"Taim mi kamap siaman, mipela i putim intres bilong ol memba i go pas long olgeta samting mipela i mekim.

Mista Smare i tok menesmen tim bilong Nambawan Super i bin lukluk long stretim gen ol sevis bilong memba, stretim gen invesmen strateji bilong mipela.

Dispela i helpim mipela long sevim ol long taim memba bilong mipela, na tu helpim mipela long strongim gutpela pasin bilong sevim ol memba bilong mipela, husat bai stap yet wantaim Nambawan Super inap 30 o 40 yia.

Nambawan Super laik kirapim planti wol klas bilding

INVESTIMEN long propeti sekta i makim 14 pesen bilong total invesmen potfolio bilong Nambawan Super, Siaman Anthony Smare i tok.

Mista Smare i tok mani mak bilong dispela 14 pesen i sanap olsem K800 milien, tasol i gat sampela moa projek we Nambawan Super i laik yusim K600 milien na inves long propeti developmen.

Em i mekim dispela toktok taim em i opim nupela 11-stori bilding bilong Nam-

bawan Super long Pot Mosbi long las wik Fonde.

Nem bilong dispela bilding em i Deloitte Haus, na em i wanpela nupela propeti invesmen bilong Nambawan Super.

"Nambawan Super nau i lukluk long kirapim ol nupela na stail wol klas bilding long larim ol biknem kampani na opis stap insait long ol haus bilong mipela, na tu dispela bai helpim Nambawan Super i mekim mani," Mista Smare i tok.

Mista Smare i tok ol dis-

pela propeti bai stap gut tru stret long gutpela ples, bai stap long intenesenel stendet, bai gat ol gutpela samting long yusim insait long haus, na bai makim ol biknem kampani long kamap kastoma taim ol i rentim opis spes.

"Mipela i bilip olsem dispela developmen bai kamap wanpela bikpela propeti insait long kapital siti bilong kantri," Mista Smare i tok.

Nupela 11-stori bilding Deloitte Haus bilong Nambawan Super long Pot Mosbi.



SMART SOLUTIONS FOR SMALL BUSINESS

"With the **BSP Smart Business Package**, I offer the right mix of payment options for my customers; **EFTPoS, Mobile and Internet Banking** and I use a **Smart Business Debit Card** for my supplier payments.

Plus, the Smart Business current account provided transaction records that were used to support my **BSP Smart Business Loan** application to help me expand my Business."

Helen Victor
Owner of Zoenani Gas Ltd
BSP Smart Business customer



WE ARE **BSP**

WANTOK
KOMENTRI

Kirapim tingting bilong ritim buk oltaim

TAIM bilong selebretim Nesanel Buk wik long kantri i kamap gen long dispela mun Ogas.

Olgeta skul na ol haus buk o laibreri i gat program bilong kirapim tingting bilong ol pikinini long ritim buk na luksave olsem ol buk i opim rot bilong kisim save.

Pasin bilong ritim buk i mekim yumi i save long wanem kain samting i kamap long wol tude na ol samting i bin kamap bipo . Planti ol bikpela saveman na merii raitim ol samting na yumi tu i ken kisim save long taim yumi ritim ol dispela kain buk.

Tude planti papamama i wari bikos ol pikinini i no save ritim buk tumas.

Planti pikinini na ol bikpela manmeri tu i wok long bisi long holim mobail fon na i no moa tingting long ritim buk.

Ol i larim mobail fon i bosim laip bilong ol. Ol i ting ol i ken

kisim olgeta nius na save long mobail fon olsem na i no gat wok moa long ritim buk o niuspepa o ol megasin.

Yumi no kisim gut pasin bilong ritim buk oltaim bikos prais bilong wanpela buk i dia tumas.

Ol pipel i no gat kain mani olsem long baim wanpela buk. PNG i no gat bikpela buk bisnis. Oltaim yumi save baim buk em ol ovasis manmeri i raitim na printim.

Long taim ol dispela buk i kam insait long kantri bai ol i mas baim takis bilong gavman na dispela tu i mekim na prais bilong buk i save dia tumas.

I no gat planti pipel insait long kantri i save raitim ol buk tu. I gat sampela lain i raitim buk bilong ol pikinini na ol buk bilong laip stori o ol stori nabaut, na i gat sampela saveman long ol yunivesiti i raitim buk, tasol ol tu i save painim mani long printim buk.

Gavman i no luksave yet na helpim ol dispela lain husat i laik raitim buk.

Long ol arapela kantri, gavman i save sapatim ol raita long mekim wok bilong raitim na printim buk. Ol i save gat ol kompetisen bilong raitim ol stori na bihain bai ol i printim ol dispela stori i win.

Long taim ol i mekim olsem, bai ol i kirapim tingting na strongim laik bilong ol pipel long raitim ol stori na kamapim buk.

Dispela tu bai mekim moa pipel i spendi taim bilong ol long ritim buk.

Ol skul li save hatwok long painim buk long putim long laibreri.

Sampela skul i no gat aibreri bikos i no gat mani o klasrum spes long kamapim laibreri. Long ol provins tu, i no gat ol pablik laibreri we ol manmeri i ken go kisim na ritim ol buk.

Bikpela mani i save go long sanapim ol rot na bris na ol arapela projek bilong gavman, tasol i no gat mani i go long strongim ol pablik laibreri.

Long ol ples we i no gat ol pablik laibreri o ol skul laibreri, ol pikinini i save kisim taim bikos i no gat ples we ol i ken go painim buk long helpim skul wok bilong ol.

Tude i gat ol praivet lain i mekim wok bilong strongim ol pikinini long ritim buk. Em i gutpela eksampel ol arapela grup long ol provins tu i ken bihainim.

Yumi no inap wetim gavman tasol long mekim ol dispela kain sevis bilong helpim pipel. Sapos yumi yet i go pas long wok bai gavman i ken kam bihain na givim han.

I mas gat ol pablik laibreri long wan wan provins na olgeta yia, provins yet i mas putim mani long baset bilong lukautim ol dispela laibreri.

Tude ol laibreri i stap tarangu

bikos i no gat gutpela sapat i save kam long nesanel gavman na ol provinsal gavman.

Dispela em sampela samting yumi mas skelim na traim long stretiim long taim kantri i makim Nesanel Buk Wik.

I gutpela long raun long ol skul na toktok wantaim ol pikinini na kirapim tingting bilong ol long ritim buk.

Tasol yumi mas putim mani i go insait tu long strongim ol laibreri. Yumi mas putim mani long helpim ol raita bilong PNG.

Yumi mas skelim gen na rausim ol takis bilong kisim ol buk i kam insait long kantri.

Yumi mekim olsem ating bai prais bilong ol buk i kam daun na yumi lukim moa pikinini na ol bikpela manmeri tu i holim buk long han na i no inap hangamap tumas long ol mobail fon olsem ol i wok long mekim nau.

Daru Ailan nidim gavman sevis

DARU ailan em i wanpela laspela taun insait long PNG we planti developmen i no kamap.

Memba bilong South Fly, Aide Ganasi, i tok planti ol gavman na lida pastaim i bin lus tingting long givim sevis long ol pipel bilong Daru.

Dispela i mekim Daru taun i stap bek

yet taim ol arapela taun long PNG i wok long senis na kamap gutpela na bikpela.

Mista Ganasi, husat i Deputi Spika bilong Nesanel Palamen, i tok em i bin stap long kot na dispela i bin holim taim bilong em long givim sevis long pipel bilong Saut Fly.

“Mi wok long givim sevis nau long ol pipel.

Pastaim tripela yia bilong mi long opis i no bin gutpela taim long mi long mekim wok bikos mi bin westim taim long kot,” Mista Ganasi i tok.

Mista Ganasi i tok Daru Ailan i no bin kisim planti sevis bikos pastaim ol lida na gavman i lus tingting long ol pipel long dispela ples.

Mista Ganasi i tok em bai mekim moa wok long givim wara saplai sevis na stretim gen rot insait long Daru ailan.

Em i tok pastaim gavman, provinsal gavana, memba, edministreta na ol wok manmeri bilong provinsal gavman i bin givim baksait long Daru.

Slip i save helpim bodi

OL saveman i tok slip i givim gutpela helt long bodi na i ken helpim manmeri long stap longpela taim long laip.

Kisim inap slip na slip long ol rait taim i ken helpim long strongim tingting na bodi long stap gut long laip.

Long stap wanpela i pilim long bodi na tingting dispela i go bek long kain slip wanpela i bin kisim long en.

Ol i tok taim wanpela i slip, bodi i save sapatim tingting o kru long wok gut na i mekim bodi long stap helti.

Taim ol pikinini, kisim inap slip em i save helpim bodi bilong ol long develop na gro gut.

Hevi o bagarap i ken kamap isi, taim wanpela i no kisim gutpela slip olsem wanpela i draiv na i slip na bamim kar o sumatin i no lain gut long klas.

Taim wanpela i no save kisim gutpela slip long planti taim sampela taim hevi bai i no inap kamap hariap tasol bihain long laip wanpela bai bungim ol hevi olsem het pen, ai pen na ai wara kamdaun na pilim les hariap taim wanpela i laik mekim wok.

Ol narapela hevi em wanpela i no inap tingting gut, wok gut, lainim samting na wok bung wantaim ol narapela manmeri.

Taim wanpela i slip dispela i helpim bodi bilong en long redi long stap gut long narapela de. Slip i helpim bodi long kamapim ol nupela rot long lain na holim gut ol toktok.

Ol wok painim ol saveman i mekim i soim olsem kisim inap slip na kisim slip long ol rait taim i save helpim wanpela long lain gut, pilai musik, skelim na tromoi stik bilong paitim golf o long draivim gut kar long rot,

balus na sip.

Kisim gutpela slip i save helpim wanpela long skelim na harim gut ol tingting na toktok na long mekim ol disisen long laip.

Ol wok painim i soim tu olsem taim wanpela i no kisim gutpela slip na slip

long ol rait taim dispela i save bagarapim sampela hap bilong bodi bilong en. Kain ol bagarap olsem i no skelim gut tingting na mekim ol disisen, i no inap stap isi (patience), painim hat long stretim ol hevi na i no inap long kontrolim ol pilim bilong en na i ken mekim wanpela i tingting planti, wari na wanpela i ken kilim em yet.

Long dispela as i gutpela wanpela i mas oltaim kisim gutpela slip.

Ol saveman i tok tu olsem kisim gutpela slip i helpim bodi bilong wanpela long gro gut, lewa (hat) bilong en i stap gut na rot long bodi i stap stret long blut i ran gut.

Kisim gutpela slip i helpim wanpela long em i no kisim isi ol sik olsem sik long lewa (hat atek), kidni, sik suga o kisim strok na i save laik long kaikai planti.

Ol wok painim i soim tu olsem taim wanpela i no kisim gutpela slip long wanpela taim, maski em i abrusim olsem 1-pela o 2-pela aua tasol, wanpela bai pilim olsem em i no bin slip tru long nait. Dispela em bikos bodi i no kisim inap slip em i mas kisim long en.

Ol saveman i tok long stap helti long laip, kisim inap slip na slip long rait taim i bikpela samting.

Long ol pikinini ol i mas kisim olsem 8-pela o 9-pela aua long slip.

Long nait em i gutpela ol pikinini i mas stat slip long 9-klok na ol bikpela manmeri i gutpela ol i stat slip long 10-klok.



WANTOK
Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: (675) 325 2500
Fax: (675) 325 2579
Email: editorial@wantokniuspepa.com

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

K300 spot fain long buai

NATIONAL Capital District (NCD) i mekim gutpela wok long senisim Pot Mosbi siti taim ol manmer i wok long bagarapim bikpela kepitot siti bilong kantri wantaim rabis na pipia bilong buai.

Deputi Siti Menesa Honk Kiap, husat i go pas long NCDC Buai Ben i tok sapos ol manmeri i salim buai o kaikai buai na spetim buai spet nating long pablik ples, ol bai peim K300 spot fain mani.

Mista Kiap i askim ol manmeri insait long Pot Mosbi siti long no ken salim buai long ol pablik ples, na tu em i askim ol manmeri husat i save kaikai buai, long ol i no ken spet nabaut long pablik ples na bagarapim siti.

Mista Kiap i tok sapos ol sekyuriti gad bilong NCD Buai Ben i holim yu, bai yu peim K300 spot fain.

“Ol bai holim yu na kisim yu i go long Tengdui Depo klostu long 4-Mail woks kompaun na bihain long en bai yu peim K300,” Mista Kiap i tok.

Mista Kiap i tok ol NCD Buai Ben polis opisa bai putim ol rot blok long sekim buai i kam insait long siti.

“Em i taim bilong mekim eksen nau. Mipela bai setim rot blok na sekim ol kar i wok log kam insait long siti wantaim ol bek buai,” Mista Kiap i tok.

Em i tok spot fain bai go antap long K500 taim ol lota bilong NCDC i pinisim ol pepa wok long kamapim wanpela lo long stopim buai long Pot Mosbi Siti.

Coronary bypass surgery

Coronary bypass surgery is a surgical procedure that diverts the flow of blood around a section of a blocked or partially blocked artery in your heart. By creating a new pathway to the heart, coronary bypass surgery improves blood flow to your heart muscle.

During coronary bypass surgery, a healthy blood vessel is taken from your leg, arm or chest and connected to the other arteries in your heart so that blood bypasses the diseased or blocked area.

After coronary bypass surgery, symptoms, such as chest pain and shortness of breath due to poor blood flow to the heart, generally improve. For some people, coronary bypass surgery may improve heart function and reduce the risk of dying of heart disease.

Why is it done ?

You and your doctor can consider whether coronary bypass surgery or another artery-opening procedure, such as angioplasty or stenting, is right for you.

Coronary bypass surgery is an option if:

You have severe chest pain

caused by narrowing of several of the arteries that supply your heart muscle, leaving the muscle short of blood during even light exercise or at rest. Sometimes angioplasty and stenting will help, but for some types of blockages, coronary bypass surgery may be the best option.

You have more than one diseased coronary artery and the heart's main pumping chamber — the left ventricle — isn't functioning well.

Your left main coronary artery is severely narrowed or blocked. This artery supplies most of the blood to the left ventricle.

You have an artery blockage for which angioplasty isn't appropriate, you've had a previous angioplasty or stent placement that hasn't been successful, or you've had stent placement, but the artery has narrowed again (restenosis).

Coronary bypass surgery may also be performed in emergency situations, such as a heart attack, if your doctor sees that you're not responding to other treatments.

Coronary bypass surgery doesn't cure the underlying heart disease that caused

blockages in the first place. This disease is referred to as atherosclerosis or coronary artery disease.

Even if you have coronary bypass surgery, lifestyle changes are still a necessary part of treatment after surgery. Medications are routine after coronary bypass surgery to lower your blood cholesterol, reduce the risk of developing a blood clot and help your heart function as well as possible.

After Procedure

After surgery, most people feel better and may remain symptom-free for as long as 10 to 15 years. Over time, however, it's likely that other arteries or even the new graft used in the bypass will become clogged, requiring another bypass or angioplasty.

Although bypass surgery improves blood supply to the heart, it doesn't cure underlying coronary artery disease. Your results and long-term outcome will depend in part on taking your medications to prevent blood clots, lower blood pressure, lower cholesterol and help control diabetes as directed, and following healthy lifestyle recommen-

dations, such as these:

Stop smoking.

Follow a healthy-eating plan, such as the DASH diet.

Maintain a healthy weight.

Exercise regularly.

Manage stress.

In addition to lifestyle changes you'll need to make after your surgery, your doctor will frequently recommend a cardiac rehabilitation program. Cardiac rehabilitation — also called cardiac rehab — is a customized program of exercise and education, designed to help you recover after a heart attack, from other forms of heart disease or after surgery to treat heart disease. Cardiac rehabilitation often begins while you're still in the hospital and continues with monitored programs in an outpatient setting until home-based maintenance programs can be safely followed.

PIH is Port Moresby's largest private hospital offering more than 14 specialities under one roof, with specialists and technologically advanced equipment being utilized to bring modern healthcare to PNG. PIH is the only hospital in

Papua New Guinea to set up a fully functional tertiary care unit especially for Cardiac Care. The doctors and cardiac surgeons of PIH have conducted several successful open heart surgeries and angioplasties and helped many afflicted PNGians.

If you have any further queries about CABG or other cardiac procedures, please feel free to email us at info@pih-png.com or simply walk in and ask to be shown around the new facility.

Disclaimer: The information available on this feature related to images, graphics, text and other content is available for educational purposes only. Seek the advice of your doctor in respect to questions on a medical condition or treatment and do not disregard the doctor's professional advice after reading information in this feature.

Reference: Mayo Clinic, USA.



GET YOUR HEART CHECKED AT PIH, TODAY!

OUR ADVANCED CARDIOLOGY SERVICES ENSURE YOUR HEART IS IN SAFE HANDS

Why fly abroad, when help is within reach at PIH

PIH is inviting a specialist from overseas to handle **open heart surgery** in Papua New Guinea for a limited time period. It will be at a discount of upto 25% and will cost K 45,000* .

Hurry! Book your appointment today



Pacific International Hospital : Sec 105, Lot 2, Taurama, 3 Mile, Port Moresby, PNG, Ph : 799 88 000
PIH Clinic : Ground Level, Vision City Mega Mall, Waigani Drive, Port Moresby, PNG, Ph : 7 100 2873
info@pihpng.com | www.visioncity.com.pg | www.pihpng.com | www.facebook.com/pihpng * T & C Apply

Call us today
71558866



San taim bringim planti mumut mit long salim

Kot givim 130 yia kalabus taim long ol Karkar trabel lain

James G. Kila i raitim



EM TAIM bilong san na liklik ren na mumut i kamap planti nau long bus olsem na ol rot-sait maket arere long haiwe long Madang i wok long salim ol mit bilong mumut planti nau.

Long Madang-Ramu Haiwe stat long Naru i go olgeta long Usino maus-rot na go olsem long Walium, Asas na go olsem long Ramu Suga na Watarais na Markham seksen bai yu ken lukim ol ples lain i salim ol dispela abus i stap arere long rot. Paia save lait na givim smuk

Wanpela meri long Naru eria salim ol mumut arere long Madang-Ramu Haiwe. Em i salim long K30 long wan wan bikpela mumut. *Poto: James G. Kila*

long ol mumut mit na em save hot gut i stap long ol kastoma go baim.

Planti ol lain husat save ron long kar i save go stop na askim ol lain i salim mumut na toktok i go kam long prais na ol save baim.

Las wik tasol planti mumut tru i bin stap long ol rot-sait maket stat long Naru i go olsem long Miraine maket na tu long Usino maus-rot.

Prais bilong ol bikpela mumut mit em ol asples lain i rausim bel bilong en pinis em stat long K30 na go antap. Na ol liklik em K10 i go K20.

James G. Kila raitim

NESENEL Kot long Madang long las wik i givim kalabus taim long 6-pela lain husat i bin bagarapim wanpela meri saintis bilong Amerika long Gamog viles long Karkar ailan long 2012.

Nesenel Kot jas Jastis David Cannings i givim taim bilong mekim save long ol dispela 6-pela trabel lain long wanpela bilong ol tasol. Dispela em bikos arapela faivpela i ranawe na hait yet taim ol i bin go kam long kot

sampela taim i go pinis.

Ol dispela lain husat i bin ranawe pastaim long Kot i givim taim bilong mekim-save em Timothy Damasuk, Kadaman Nanui, Muluk Panaluan na Luwi Siam.

Kot i givim warent pinis long polis long painim ol.

Jastis Canning i givim kalabus taim long Damasuk, Panaluan, Siam na Nanui long stap insait long kalabus 24 yia long Beon Haus Kalabus long Madang. Em i givim 23 yia kalabus taim long Kisou na 11 yia na nain mun long

Lod.

Tupela narapela Kulem Kisou na Kabian Lod i bin go kam long olgeta kot bilong ol, tasol Kisou i ranawe las wik tasol

Jastis Cannings i tok olsem dispela foapela lain husat i bin ranawe pastaim i kisim mekim-save taim bilong ol pinis na no gat sans bilong ol long mekim wanem toktok egensim kot.

Ol dispela lain bilong ples Gamog long maunten bilong Karkar ailan em kot i painim ol i kamapim bikpela hevi tru taim ol i

holim na mekim nogut long dispela meri saintis wan-taim man bilong em na wanpela lain husat i go wantaim ol na stilim ol samt-ing bilong ol.

Dispela pasin nogut ol sikspela lain bilong Gamog long Karkar i bagarapim stret nem bilong Karkar ailan, Madang provins na PNG wantaim.

Ol dispela lain bilong Amerika (USA) i stap wantaim pret na tingting bilong ol nau i no orait yet bihain long dispela bikpela trabel long Karkar ailan.



PNG Air

CENTRAL RESERVATIONS

Phone: + 675 7222 2151 | Fax: + 675 325 4867
DIGICEL TOLL FREE NUMBER 16111 | Email: reservations@pngair.com.pg

Aipas sumatin gat nupela breil masin

Paul Zuvani i raitim

PLANTI disebel manmeri i no inap mekim gutpela wok long laip bikos i no gat gutpela helpim i stap long strongim ol, Martin Kawage, husat i aipas na i aipas tisa i tok long Pot Mosbi las wik long taim ol aipas sumatin i kisim nupela breil prin masin.

Dispela prin masin em Gavman bilong Australia na ol pipel bilong em aninit long AusAID i givim na givim long mani mak bilong K350,000.

Kawage i tok planti ol disebel sumatin i no inap pinisim gut skul bikos i no gat gutpela masin i stap bilong helpim ol.

‘Mipela i nidim ol rait masin long mekim gut long laip tasol bikos i no gat gutpela helpim, planti ol sumatin olsem mi i abrusim ol sans long strongim ol laip,’ em i tok.

Spesel Edukesen program i baim foapela dispela ol print masin we ol i putim wanpela long Maun Sion Aipas Skul long Goroka i makim Hailans rijen, wanpela long Insevis

Skul long Pot Mosbi i makim Sauten rijen, wanpela long Kokopo long Is Nu Briten i makim Niugini Ailans rijen na wanpela long ol senta long Mamose rijen.

Dispela prin masin inap tanim ol tok i go long breil na printim 900-pela kopi long wanpela aua.

Wantaim kain masin ol atoriti i tok dispela inap helpim ol aipas sumatin long lain gut long edukesen Karikulum o program we ol gutpela ol bodi lain i save yusim long lain.

Moa yet ol i tok dispela inap helpim ol aipas sumatin long sindaun long ol eksam long wankain taim we ol gutpela ol bodi lain i sindaun long eksam tu.

Arnold Koima, hetman bilong Spesel Edukesen Tisa divisen bilong Edukesen Dipatmen bai go pas long ranim dispela Spesel Edukesen Karikulum program long kantri.

Deputi Edukesen Seketari Dokta Eliakim Apelis i kisim dispela prin efosa o masin long han bilong

Suzanne Edgecombe bilong Australia Hai Komisen.

Dokta Apelis i amamas na i tok tenk yu long Gavman bilong Australia na ol manmeri long helpim bilong ol.

Edgecombe i tok dispela helpim i makim kain gutpela wok bung stap namel long tupela kantri, PNG na Australia.

Em i askim Edukesen Dipatmen na ol lain husat bai go pas long yusim dispela ol masin long lukautim ol gut.

Kumul Trening Institut holim namba 25 greduesen

Josiah Ururu Kana i raitim

KUMUL Trening Institut (KTI) i holim namba 25 greduesen seremoni bilong en long Mande Ogas 1, 2016 we ol i lukim 173 man na meri i kisim ol setifiket na diploma bilong ol long Bisnis, Tisa trening bilong lainim ol liklik pikinini, Turisem na hospitality, na plen na moto vehicle trening.

Mista Isaac i bin makim maus bilong NCD gavana na Pot Mosbi Saut Iktoret TVET kodineta, Misis Rose Hagua husat i meri go pas long dipatmen i sponsa long planti bilong ol sumatin i bin stap long dispela seremoni.

Max Kuri, Dairekta bilong KTI, i tok olsem KTI em i wanpela institut we i gat 10-pela yia bilong operesen pinis na i holim nau 25 greduesen seremoni pinis na namba bilong ol sumatin long olgeta yia i wok long go antap.

Em i tok dispela em i wanpela lokal man yet i papa long en na i stap aninit long Nesenel Trening Kaunsil, em i wanpela han bilong dipatmen bilong emploimen. KTI i gat spesel singaut long givim namba tu sans long ol lain husat i no mekim gut long skul long namba wan taim.

Mista Kuri i tok long edukesen sistem

olsem em i wanpeal pyramid o maunten kain sistem we daun-bilo as bilong en i braitpela na taim yu go antap em i go liklik. Gavman i givim ol wok long mekim daunbilo as bilong edukesen i go bikpela moa na givim moa sans long ol lain husat i no kisim bipo.

Mista Kuri i tok, “Kumuls Trening i gat 5-pela kategori bilong ol setifiket na diploma program. Ol program em bisnis, we i karamapim olgeta subjek bilong bisnis stadi olsem Infomesen Teknoloji na komuta, tisa trening bilong ol tisa bilong ol liklik pikinini, we i karamapim ol elementri tisa, priskul tisa, kindagaten, foniks 1 na 2 na ol narapela olsem. I gat turisem na hospitality kos, plent na moto trak rening na teknikal vokesenel trening o laip skil we i gat ilektrikal, waia, kapentri, mekenik na ol narapela.”

Mista Kuri i tok tenkyu long ol lain i makim Gavana Powes Parkop na Memba bilong Pot Mosbi Saut, Justin Tkachenko long TVET skolasip program bilong en.



Ol sumatin i kisim setifiket long han bilong Dairekta bilong KTI, Max Kuri na Kodineta bilong Pot Mosbi Saut Iktoret, TVET program, Rose Hagua. Foto: Nicky Bernard.

Rose Hagua, Kodineta bilong Pot Mosbi Saut TVET opis i tok tenkyu long ol sumatin husat i bin kam aninit long TVET program. Em i tok nau em i wok bilong ol long givim samting i go bek long Gavana na Memba bilong Pot Mosbi Saut na ol bai mas kamap ejen long kamap ol sitisen husat i save mekim bikpela wok.

Em i mekim luksave long bos bilong en, Justin Tkachenko na Gavana Powes Parkop

long wok gut wantaim olgeta taim na i gat bikpela wok i save kamap insait long sotpela taim. Misis Hagua i tok Minista Tkatchenko na Gavana Parkop i amamas tasol long sponsoa long TVET na bai mekim yet olsem na moa sumatin i mas aplai.

Greduesen seremoni i bin kamap gut tru na em i givim KTI moa hop long kamapim gutpela ples long PNG bihain taim.

UNICEF opis bai stap long Goroka



Ekting Sif Eksektiv Opisa bilong EHPHA Joshua Soso (namba 2 long lephan) na UNICEF representativ Dokta Ghanasshyam Sethy wantaim ol bebi neseri helt woka husat i save wok long lukautim ol nupela pikinini em mama i karim ol long Goroka Provinsal Haus sik long Isten Hailans. Foto: Loutova Siapea

Siapea Loutova i raitim

WOK bilong karim na lukautim ol pikinini em i no isi wok.

Ol pikinini i ken gro na kamap gut, tasol i gat taim we ol i save painim sik na haus sik em i wanpela ples ol mama i save karim ol pikinini i go long en long kisim helpim.

Na ol helt woka i save mekim gutpela wok long helpim ol dispela pikinini wantaim mama bilong ol. Dispela pasin em i wok long kamap long olgeta de long bikpela Goroka Provinsal haus sik.

Lukluk long ol pikinini na namba bilong ol we i wok long gro yet i go bikpela long

provins, Isten Hailans Provinsal Helt Atoriti (EHPHA) i lukluk nau long kisim ol helpim i kam long ol pren na patna long PNG na ovasis tu long helpim na go het long givim gutpela helt kea na sevis i go long ol pikinini na mama bilong ol tu long provins.

Nau yet wanpela bikpela global ogenaisesen em Yunaited Nesenes Pikinini (UNICEF) i redi long kirapim wanpela opis na wok long Goroka, Isten Hailans provins.

Kantri Dairekta bilong UNICEF, Olushola Isimel wantaim wanwok bilong em Dokta Ghanasshyam Sethy i bin kamap na pasim toktok wantaim Sif Eksektiv Opisa (CEO) bilong Isten Hailans

Provinsal Helt Atoriti (EHPHA) Joshua Soso long dispela tingting bilong ol.

Na Soso i wanbel na wekamim ol long kirapim opis long Goroka, long wanem taim UNICEF i go insait long wok wantaim provinsal haus sik na EHPHA, planti gutpela samting bai inap kamap. Na bikpela senis tu bai i ken kamap long sait bilong helt kea bilong ol liklik pikinini long provins.

“Mi, olsem CEO bilong EHPHA i gat bikpela amamas long dispela tingting bilong UNICEF, long wanem, mipela laik wok wantaim ol long pasin patnasip na kamapim senis long laip bilong ol pikinini, ol man na meri na provins tu”, Soso i tok.

100 Yia long Methodist Sios

Tony Sapan i raitim

SIWAI Divisen bilong Yunaitet Sios long Bogenvil bai makim 100 yia bihain long kamap bilong Lotu Methodist long Bogenvil long namba 16 de bilong mun Septemba 1916.

Siwai, Kieta, Teop na Buka divisen bilong sios bai i salim 200 kristen manmeri wanwan long i go long dispela bung we bai ol lain I makim ol Kristen bilong Englan, Nu Silan, Australia, Tonga, Solomon Ailans na Fiji misinari na ol

kristen manmeri i kamap tu long en.

Fiji bai i salim 20, Solomon Ailans 200, Rabaul 300 na Hailans i salim 100 misinari na Kristen. Ol i ting 10,000 kristen bai kamap long Tonu long stap long dispela bung long makim 100 yia. Man i go pas long dispela de, em olupela Pasta, David Pausu husat i bin bringim Methodist sios i go long Siwai na Bogenvil long 1916 bihain long pinisim skul long wanpela koles bilong ol pasta long Mono,

insait long Solomon Ailans.

Reveren Akuila Kiaku, minista i go pas long Siwai seket i tok tripela de long ol bung bilong makim dispela de bai i stat wantaim ol bung long wan wan de long Hari na Ruhuaku seket na pinis wantaim tripela de bung long Siwai.

Reveren Kiaku i wok long toktok long Tonu we ol wok red ii go het pinis long wokim ol ges haus yusim ol samting bilong bus long lukautim planti tausen lotu manmeri em ol i ting bai ol i kamap long dispela bung.

Bai gat miting bilong ol Kavieng-Lorengau Daiosis

Tony Sapan i raitim

Miting bilong ol Katolik meri insait long Namatanai Dineri bilong Kavieng-Lorengau Daiosis em ol i save holim olgeta tripela yia bai i kamap namel long mun Ogas long Milmila Paris long

Duke ov York ailan insait long ENB pronvins.

Samting olsem 60 Katolik meri, 10-pela bilong wanwan long 6-pela paris insait long Dineri wantaim 10-pela yangpela bai i kamap long Milmila bilong dispela tupela bung stat long Ogas

14 inap long de namba 15.

Antap long sekim wok bilong ol insait long tripela yia i go pinis, bai ol makim tu pestode bilong Bisop Ambrose Kiapseni na makim ol nupela eksekyutiv.

Ol i mekim wok redi long NBC ENB i

wokim laip brodkas long dispela tupela de miting we Nima-mar Spesel Papas Atoriti i strongim ol Katolik meri insait long NTI Dineri long kisim wok bilong ol i go long narapela level bilong gutpela bilong ol Katolik meri insait long Dineri.

Pop Francis askim ol yangpela long lainim gutpela pasin

POP Francis i pinisim wokabaut bilong en long amamasim na makim Wol Yut De long Polan wantaim

bikpela misa. Dispela misa i kamap ausait long haus lotu olsem i kamap long wanpela

spot stedium. Long dispela misa em i tokim ol yangpela long ol i mas lukluk i go moa long wanem samting i gutpela long laip bilong ol na no ken lainim ol samting nogut i kamap long teknoloji long wol.

Planti tausen ol yangpela i slip long nait ausait wetim Pop na soim plak bilong kantri bilong ol taim Pop Francis i go long mekim misa long Krakov.

Pop Francis, i gat 79 krismas nau, i kisim 5-pela de long mekim dispela wokabaut long Polan long amamasim Wol Yut De.

Pop Francis i tok em yet i no gutpela long teknoloji na askim ol yangpela long ol i mas holim pas pasin bilong beten na i no ken tingting na yusim tumas sosel media.

Em i tok tingting bilong God i no olsem memori kad we i pulap long toktok na laip stori bilong ol manmeri tasol we i gat pasin bilong laikim na marimari na bilong rausim o pait long ol pasin nogut. Em i askim ol yang-

pela long go moa yet long, 'driman long bilip long gutpela bilong laip bilong ol manmeri, we i rausim pasin bilong belhat, kros pait namel long ol manmeri na no ken lukim narapela manmeri olsem birua.'

Wokabaut bilong Pop Francis i lukim tu bikpela wok bilong sekyuriti i bin kamap olsem nogat birua o hevi i mas kamap we ol opisa i yusim ol masin bilong luksave long ain samting ol manmeri i karim na i yusim ol dok we i ken smelim ol birua samting manmeri i karim i go long ol hap we Pop i wokabaut o i stap long en.

Long taim em i stap long Krakow, Polan, Pop Francis i harim na i sori long nius bilong wanpela lapun pater we ol teroris i kilim long kantri Frans long las wik. Long dispela em i tok wol i stap insait long bikpela pait we i no long tok bilong relijen o God tasol long ol ausait tok. Long dispela taim Pop Francis i tokaut tu long narapela Wol Yut De we bai kamap long kantri Panama, Saut Amerika long 2019.

Ol yangpela i amamas long Wol Yut De long Polan

PLANTI ol yangpela i tok ol i amamas long wokabaut bilong ol i go long Polan long amamasim Wol Yut De.

Ol i tok maski wanpela, wanpela i bilong narapela kantri, tasol kain bung i soim i gat wanpela God na ol i wanpela pipel tasol.

'Mi laikim tru opening sseremoni bilong dispela wokabaut. Dispela i nupela samting long mi long wanem taim olgeta lain yumi ol yangpela i stap long Polan, mi ken luksave long wanem samting i wok long kamap,' Stephanie Santos bilong Australia i tok.

'Mi lukim stret stap bilong Katolik Sios, we i stap long olgeta hap graun na soim olsem dispela sios i stap laip na i stap strong yet.

'Mi laikim taim mipela olgeta i prea na singim song 'Jisas Kraus yu laip bilong mi.' Dispela i gat bikpela mining na i tok long yumi ol yangpela long Jisas i mas i stap pas long laip bilong mipela,' Santos i tok.

Em i tok em i stap long wanpela liklik kantri taun long Australia we i nogat ol planti Katolik komyuniti i stap tasol long em i kamap long kain bung olsem i opim ai bilong en na i tokaut long strong bilong dispela yunivesel sios.

'Em i gutpela long mi givim olgeta dispela de i go long kain selebresen olsem. Na sapos mi mas mekim gen, mi bai amamas tasol long mekim,' Yvonne Sinisa bilong

Sidni, Australai i tok.

'Maski ren na snow i pundaun dispela i no pasim mipela long bung, prea na amamasim dispela (Wol Yut) De.

'Long stap insait long kain bung olsem, wanpela i ken pilim narapela kain bel isi na wanbel spirit i stap insait.

'Mi gat hop olsem bai gat senis long wanem bilip ol manmeri i gat long em na olsem olgeta bai wantaim bai bilip long Jisas Kraus.

'Na mi laik serim wanem samting mi pilim long hia (Krakow- Polan) taim mi go bek.

Sampela ol yangpela i bin tingting planti sapos ol i mas kamap long dispela bung tasol bihain long dispela ol i tok em i gutpela ol i kamap.

Wanpela yangpela Anna Juszczak bilong Kasinki Malej, Polan i tok: 'Mi bin tingting planti sapos mi mas kam o nogat tasol bihain long taim mi kam na amamasim dispela de mi tok em i gutpela mi bin kam.

'Mi bai go tu long vigil (prea) bung long Misericordiae. Ol bung, pilag na ol singsing tasol moa long dispela kamap long misa i givim mi narapela kain piling.

'Ol samting i kamap long hia i gutpela tru, planti kainkain tok ples na olsem mi laik lukim moa kain ol nupela samting i kamap long bilip bilong mipela.

'Maski mipela bilong narapela ol hap, i gat wanpela God tasol,' em i tok.



7-pela yut bilong wanwan kontinen wokabaut kam insait long bikpela fil ol i kolim Marimari fil wantaim Pope Francis long Wol Yut De long Poland.

Na Alex Wolf bilong Puerto Varas bilong Chile tok em i laikim planti kain samting i stap long Polan.

'Mi lukim olsem bilip bilong yupela long hia i bikpela samting. Nogat manmeri i gat planti tingting taim ol tok long bilip long God,' em i tok taim 90 pesen bilong ol manmeri long kantri i stap Katolik.

'Misa i givim mi sans long bungim ol yangpela long wanwan ol kantri na long narapela kontinen. Mi bai amamas long bung wantaim Pop Francis,' Olya Korablivoa bilong Ukraine i tok.

Na Omar Espinosa bilong Yorkville, Amerika i

tok: 'Bipo long mi kamap bikpela mi laik kirapim dispela paia long bel bilong mi pastaim.

'Dispela long wanem laip long koles nogut i pas long tingting na pasin bilong graun.

'Mi hop olsem kain wokabaut i strongim bilip bilong mi long taim mi go long koles,' em i tok.


Espinosa i tok em i no bin tingting long go tasol taim em i wok long tingting na prea i stap peris pater bilong en i singautim em na i askim em long go na olsem em i go.

Em i tok bihain long dispela em i amamas long kamap long dispela bung.

Pope kam insait long getwe bilong marimari wantaim ol yut long Wol Yut De long Poland.



Em nau! Ol pikinini i ken painim rot i go long ples wantaim Wantok lain...



STORI BILONG TUMBUNA

Stori bilong Ivning Sta

Bipo tru long taim bilong ol tumbuna ol spirit i bosim ples graun. Long dispela taim Papa Afinau na Mama Roropinau i marit na tupela i gat wanpela pikinini man nem bilong em Sisiroalo. Ol i stap gut na i no longtaim bihain long tupela yia mama Roropinau i dai, orait papa Afinau i kisim wanpela nupela meri nem bilong em mama Wadi'ai. Afinau na Wadi'ai i marit na tupela i gat wanpela pikinini man tu, nem bilong em Pasi.

Bihain long 10-pela yia, Afinau i dai na sindaun bilong Sisiroalo i no gutpela moa. Olgeta wok bilong kuk, brum, gaden, klinim haus, kisim drai kokonas, wanem gen, em i wok bilong em tasol. Na oltaim em i save wok wantaim ai wara long olgeta de. Moning na belo mama, Wadi'ai i no save givim em kaikai.

Olgeta apinun taim, tupela brata i save sindaun long bet long nambis. Liklik brata Pasi i save opim lip taro ol i save yusim olsem plet, na ol gutpela kaikai tasol i stap. Taim Sisiroalo i opim lip taro bilong em em i save na lukim skin taro, skin banana tasol i stap na nogat abus. Brata bilong em Pasi i save tok, em bai skelim kaikai bilong em i go long Sisiroalo. Tasol Sisiroalo i save tok nogat brata. Mama i skelim kaikai bilong mitupela pinis, em bilong yu na dispela bilong mi.

Taim tupela brata i save pinis kaikai long apinun, Sisiroalo i save tokim Pasi; "Brata yu go pas

nau long ples, mi bai sindaun likna bihain bai mi kam." Tasol taim Pasi i go pinis, Sisiroalo i save lukluk i go long arere bilong solwara (horizon) na krai na tok; "Papa-Mama bilong wanem tu pela lusim mi bihain na mi karim bikpela hevi long laip bilong mi!

Wanpela nait taim Sisiroalo i slip, spirit bilong Papa-mama bilong em i kam na tupela i tok; "Pikinini, bilong wanem na yu krai! Sisiroalo i tok; "Mi laik i kam wantaim yutupela, mi sindaun wantaim hevi na ai wara." Orait kisim dispela lip pandanus olsem kanu bilong yu. Tupela i tokim em olgeta samting na tupela i go.

Apinun nau long narapela de i kam, tupela brata i stap long bet nambis na kaikai. Na Sisiroalo i tokim Pasi olsem; "sapos tumora apinun yu no lukim mi, na sapos yu lukim wanpela nupela bikpela sta long arere bilong solwara long olgeta apinun, yu mas tingim olsem em mi tasol." Tasol nau yu mas go long haus. Taim Pasi i go pinis, Sisiroalo i tromoi lip bilong pandanus i go long solwara na i kamap olsem kanu bilong em na i go pinis.


Olsem na olgeta taim Pasi i save lukim Ivning Sta (Evening star) em i tingim na krai long brata bilong em.

Stori i kam long Aua Ailan (Durour Is) Steven Amuru i raitim

PAINIM WOD PILAI

- Ol wod lista:**
- | | | |
|-----------------|-----------------|----------------|
| FIFTIN | LARIM | POTO |
| GUDE | LOMAN | RETPELA |
| HANGAMAP | MALARIA | ROPIM |
| HIVAPIM | META | SANGUMA |
| KALABUS | NOVEMBA | SIMBUM |
| KARIM | PASPAS | SOSPEN |
| KLAMBU | PIKININI | TEKEWE |

E B W F S A G Y T N W D R D T T I Z N S A S P B N
 B F A I R E E X E N O J U E V H S K E F A A N A Z
 O T Z H E H T P T E M M A F H P N A L P C R I O Q
 R L P F O N S O W E N L G I V E C A S I H F I I R
 N M P A N O X E D D I O Y F I V N A N N O U C N S
 K O E L S V K H A I I M E T M H P K S K M S B Z I
 M S N Z P E E S T L M A I I E A A A H A W I R K G
 W D S E T M M R I C D N P N M A O L T R N A O A G
 T K L A M B U B S G G A O A E X N A S I N T F I E
 T O O J M A A E L N V S G S P R N B P M C E T O F
 O N L T N A E S I I B N H N I I T U E A I I E O P
 V E A A S G E R H C A L B I K M A S T A E E F K S
 G I A T E R D R E H T E A S I X B K A W N P H E N
 I Q R T O T Q D M T A R K R N I I U E N M T P P R
 S T E P I D U T Y A P A O S I O Q O M D G R T O R
 F S P H O G B E T G L E Y P N M R P S T T U T T Z
 M J E D R W E E E B A A L P I B L E P A J S M O I
 Y Y L W F O M L O E I L R A C M V I S E I K G A S
 Y M T D Q H S I H D E R T I A G B A E A E C H Q F
 N O G B O I E T P A W Q S I A S I S A R N S G Z R



E G N V O E I U G N E S E R H H N E E P R A F G S
 J P Y A N M C Y U O F E C E L Q C H P E Y C E N F
 I E G K A G S N K W H N Q Z I D T S T S O B P A J
 K T L I W E R F S L A M H R B A S B T I I O I M S
 D N E I S R E D C W T E F B P I Z P F M L W R B I
 O I H M V S P D H Y Q I W O R H T M N A E I X A I
 N V F N R E S S N N H L F N E E K R A N K I B T N
 G X R H E O A Z O R O C T I X L M B M U S T L U G
 E S I L S J S E E N S G G C O G A B A A E O O I I
 N T M E P E C H F S F N E O O L C I U K N S V R M
 V E Q A D T E Z E Y L P C S A V P H S K E D W I I
 F E Z G E A H J L B E Y C J G P X A W E Z A A E N
 U F E N O I T M Z A S K N L N A B I A R N F N T P
 N G S A I F R O S K B E I G U O S N R R J S B E O
 E T P A E B M E G X M E N K Z K O I A E A Y E H R
 V L D Z O A L S U I E D R A I V I M G T S K L T E
 T V C F H C Y D R D Y N S N E M S M K A I A A C T
 A S N L S I S G P A P A I A M N O A A N R P R I E
 A E T V B N P E V R E H Z K H A R A N A W E R I N
 O E E P N T M B N L M S R A R T T L I T A I T I M

Ansa bilong Wod Pilai isu 2184

Sepik Plains bai kamap bikpela fam



Kakaruk na kiau saplai bilong PNG bai kam long Sepik Plains.

GAVMAN i sapatim wanpela bikpela egrikalsa projek long kantri.

Praim Minista Peter O'Neill i soim bikpela sapat long kirapim Sepik Egrikalsa Projek long Sepik Plains insait long Yangoru-Sausia distrik long Is Sepik Provins.

Minista bilong Treid, Komes na Indastri, Richard Maru, i go pas long dispela bikpela K55 milien egrikalsa projek.

Dispela bikpela egrikalsa projek bai kirapim planti gutpela samting long Is Sepik na kantri wantaim, Mista O'Neill i tok.

Mista O'Neill i bin lonsim dispela projek las wik long Yangoru Stesin long ai bilong Mista Maru, ol senia kabinet minista, ol memba bilong Is Sepik, na ol manmeri bilong Yangoru-Sausia distrik.

Projek patna bilong dispela projek em i Kumul Consolidated Holdings Limited (KCH) na Innovative Agro Industry Limited (IAI).

Tupela kampani i sainim pinis agrimen long statim dispela projek long K55 milien. KCH, aninit long nupela sabsideri kampani bilong

em, Kumul Agriculture Limited, bai gat 75 pesen sea long dispela projek, na bai menesim dispela fam long Huaripmo viles.

IAI bai gat 25 pesen sea long dispela projek na em bai kamap projek menesa, o kampani husat bai go pas long kirapim projek long Sepik Plains yet.

Mista Maru i tok dispela egrikalsa projek bai kirapim wanpela bikpela faktori bilong mekim kaikai bilong kakaruk wantaim tapiok.

"Bai mipela i lukautim kakaruk, na dispela projek bai mekim kaikai bilong kakaruk o stok fid," Mista Maru i tok.

Em i tok ol bai salim dispela kaikai bilong kakaruk o stok fid long PNG. Ol bai lukautim o kakaruk tu long dispela hap na salim wantaim kiau.

Mista Maru i tok ol bai planim kakao na sampla ol kaikai long salim long PNG na long ovasis wantaim.

"Sepik Plains i gat moa long 5, 000 hekta bilong graun na wanpela bikpela kakao plentesen bai kamap long dispela projek," Mista Maru i tok.

Praim Minista lonsim 'Yangoru Drop'

PRAIM Minista Peter O'Neill i tok planti manmeri long kantri i no save skelim gut ol gutpela samting gavman i mekim insait long sotpela taim long kirapim kantri.

Mista O'Neill i tok wok bilong gavman long kirapim kantri i wok long kamap gut bikos em i ples klia.

Plantu nupela rot na bris, ples balus, sip bris, fri edukesen na fri helt sevis i kamap long PNG aninit long menesmen bilong O'Neill-Dion Gavman.

Em i mekim dispela toktok taim em i lonsim nupela wara saplai projek long Yangoru-Sausia distrik long Is Sepik Provins long las wik.

Dispela wara saplai i wok long mekim nupela botol wara ol i kolim 'Yangoru Drop'.

"Mi amamas long lonsim dispela nupela wara saplai projek. Mi amamas long luksave long gutpela sevis Minista Ricahrd Maru i bringim i kam long sevim ol pipel bilong yumi.

"Dispela em i gutpela sevis gavman i

givism long pipel. Ol manmeri i no ken opim bikpela maus bilong ol na toktok long ol nogut samting bilong gavman," Mista O'Neill i tok.

Mista Maru i tok dispela wara saplai projek em i namba wan taim insait long 40 yia we Yangoru-Sausia distrik bai gat klinpela wara saplai.

Tupela kampani, Water PNG na Pacific Technologies, i bin kirapim dispela wara saplai projek insait long 6-pela mun.

Mista Maru i tok moa long 70, 000 manmeri insait long distrik nau bai gat sans long kisim gutpela na klinpela wara.

"Dispela wara em i gutpela tru, i no gat wanpela doti i stap. Mi laik tok tenkyu long ol pipel long ples long hepim tupela kontrakta long putim dispela wara saplai," Mista Maru i tok.

Em i tokim ol manmeri long lukautim ol samting bilong dispela wara saplai bikos gavman i putim mani i go insait long kirapim dispela projek long givism klinpela wara saplai sevis long ol pipel.



Nupela 'Yangoru Drop' botol wara ol i mekim long Yangoru, Is Sepik.

Mista Maru i tok em i laik kisim dispela wara long botol na givism wanpela nupela nem.

"Nem bilong dispela wara bai kamap Yangoru Drop," Mista Maru i tok.

Long wankain taim Mista O'Neill i bin lonsim nupela Sepik Egrikalsa Projek long Sepik Plains insait long Yangoru-Sausia distrik.

NICTA laik wokbung wantaim Egrikalsa Dipatmen

National Information na Communications Technology Authority (NICTA) i lukluk long wok bung wantaim Dipatmen bilong Egrikalsa.

Dispela em i toktok i kam long wanpela bikpela wok man bilong NICTA, Kila Gulo Vui.

Mista Vui i tok planti taim ol fama long PNG i save painim maket long salim ol prodak bilong ol, tasol i no gat gutpela rot na maket long helpim ol grasruts fama long salim ol kaikai.

Ol grasruts manmeri i save planim ol kaikai na ol samting long salim tasol i no gat wanpela gutpela maket long helpim ol dispela manmeri i gat sans long salim ol samting bilong ol long gutpela prais long sotpela taim.

Mista Vui i tok NICTA bai

toktok wantaim International Telecommunications Union (ITU) na Food na Agriculture Organisation (FAO) long lukluk long kamapim ol komyuta na teknologi samting long helpim ol manmeri i stap long egrikalsa sekta long painim gutpela maket.

Mista Vui autim dispela toktok long wanpela wok-sop bilong egrikalsa long las wik long Pot Mosbi.

Em i tok tupela NICTA na Diptamen ov Egrikalsa bai wok bung wantaim long bungim save bilong tupela indastri wantaim na kamapim nupela samting long helpim ol manmeri i stap long egrikalsa sekta.

"Bai yumi wok bung wantaim na bungim save bilong kompyuta na egrikalsa long kirapim ol nupela maket," Mista Vui i tok.

InterOil ripot bai kam aut klostu taim

INTEROIL Corp i tok em bai salim fainensal na opretim risalt bilong namba tu kwata bilong dispela yia i kam aut taim maket i op long Fonde.

Oil Search i lusim plen bilong em long baim InterOil long K7 bilien. Nau Exxon-Mobil i laik baim InterOil long K8 bilien tasol InterOil i tok em bai no inap kamapim wanpela bung ol i kolim kofrens kol taim em i laik givism aut dispela namba 2 kwatali ripot bilong kampani.

Long toksave pepa o maket rilis bilong em i go long New York na Pot Mosbi stok maket, InterOil i tok em bai holim wanpela bikpela bung bilong ol seaholda long September 21 long dispela yia.

Dispela bung bai bungim ol seaholda husat i holim komon sea, opsens na ristretet sea long InterOil. Ol dispela seaholda bai bung long dispela taim na sindaun long miting long toktok moa long plen bilong salim InterOil i



Dua bilong InterOil het opis long Pot Mosbi.

go long ExxonMobil.

Ol seaholda husat i gat bikpela sea insait long InterOil bai vot long dispela taim ong salim InterOil i go long ExxonMobil, husat i laik baim long K8 bilien.

InterOil i tok arapela ol infomesen na toktok long dispela plen bilong ExxonMobil i baim InterOil, bai kamaut long menesmen infomesen saikula, we InterOil bai givism long ol wan wan seaholda.

**Buy Your Air Niugini Ticket
Anywhere, Anytime
Using BSP Mobile Banking.**

Reminders:

- > Must be a registered BSP Mobile Banking customer.
- > Obtain a booking reference with Air Niugini prior to making a phone banking payment.
- > Use your e-ticket details to Check-in at the airport or online via www.airniugini.com.pg
- > Available to Digicel and bmobile-vodafone subscribers. Mobile service charges apply.
- > Fare conditions apply.



Air Niugini
www.airniugini.com.pg



Travel Purchase Queries: 180 3444
ehelpdesk@airniugini.com.pg

Mobile Banking Registration: 320 1212 / 7030 1212
servicesbsp@bsp.com.pg www.bsp.com.pg

Minista givim salens toktok long gavman bisnis



William Duma
MINISTA bilong Pablik Entaprais na Stet Invesmen, **William Duma**, i salensim ol manmeri husat i lukautim ol bisnis bilong gavman long sanap strong na ranim bisnis gut.

Mista Duma i givim dispela salens toktok long ol siaman, deputi siaman, ol dairekta, ol sif ek-

sektiv opisa (CEO) na ol menesing dairekta bilong ol bisnis bilong gavman o Stet on Entaprais (SOE) long las wik Fonde long Pot Mosbi.

Mista Duma i bin bungim olgeta maus manmeri bilong ol SOE na tokim ol long mekim moa hat wok na larim dispela wol kampani i mekim winmani.

“No ken kisim pasin bilong pablik sevan i kam insait long ol SOE. Stat wok long 8-klok moning na resis wantaim arapela bisnis.

“No ken mekim pasin bilong wantok sistem na kisim ol wan lain bilong yupela o poroman bilong yupela long wok.

“Ol wok manmeri i mas gat save na eksprens long mekim wok na kamap wok manmeri bilong kampani,” Mista Duma i tok.

Em i tok pasin wantok sistem i save bagarapim bisnis na em i les

tru long harim o lukim olsem dispela pasin i kamap long ol kampani bilong gavman.

“I gat planti samting yumi bai mekim long senisim pasin bilong ol wok manmeri na larim ol kampani i ran gut na mekim winmani,” Mista Duma i tok.

Em i tok pasin bilong les long wok olsem ol pablik sevan i save mekim i no ken kamap long ol kampani bilong gavman.

“Pasin bilong pablik sevan bilong yumi em i no gutpela. Sampela ol i no save stat wok long taim na mekim gut wok.

“Mi les long dispela pasin i kam insait long SOE. Yumi mas save olsem SOE em i bisnis o kampani. Pasin bilong ranim wok bilong praivet sekta ogenisesen i mas stap long tingting bilong ol wok manmeri,” Mista Duma i tok.

Nerau amamas long NDB mekim winmani

SIAMAN bilong Kumul Consolidated Holdings Limited (KCH) i amamas long National Development Bank (NDB) i mekim winmani na givim i go bek long mama kampani.

Paul Nerau i amamas long NDB i mekim K1 milien winmani na givim i go bek long KCH.

KCH em i trasti seaholda bilong

NDB wantaim ol arapela Stet on Entaprais (SOE) o ol kampani bilong gavman.

KCH em i mama kampani bilong ol SOE olsem NDB, Air Niugini, PNG Power, Motor Vehicle Insurance, Post PNG, Water PNG, Eda Ranu, Telikom PNG, Dataco, b-mobail na PNG Ports.

Mista Nerau i tok ol arapela

SOE i mas resis long mekim gut bisnis na mekim moa winmani.

“Mi laik tok tenkyu long NDB i mekim winmani na givim i go bek gen long mama kampani bilong em,” Mista Nerau i tok.

Em i salensim ol arapela SOE tu long mekim bisnis, resis na salens wantaim ol arapela kampani na mekim winmani.

Kumul Petroleum go bek long KCH

NESENE oil na ges kampani bilong PNG, Kumul Petroleum Holdings Limited, bai kambek gen olsem wanpela Stet On Entaprais aninit long menesmen bilong Kumul Consolidated Holdings Limited (KCH).

Siaman bilong KCH, Paul Nerau, i tokim ol niusman na arapela ol bikpela wok lain bilong ol kampani bilong gavman olsem KPHL bai kambek gen aninit long menesmen bilong KCH.

“Kumul Petroleum na Kumul Minerals bai nau i stap aninit long

menesmen bilong KCH,” Mista Nerau i tok.

KPHL i bin stap aninit long menesmen bilong Minista bilong Petroleum na Eneji (DPE). Em i bin stap olsem wanpela bisnis ham o kampani bilong DPE aninit long I menesmen bilong Minista bilong Petroleum na Eneji.

Tasol gavman i makim nupela Minista bilong Petroleum na Eneji taim pastaim Minista, Ben Micah, i lusim gavman na joinim Oposisen.

Taim Mista Micah i bin stap Min-

ista bilong Petroleum na Eneji, em i bin was long KPHL.

Bod na menesmen bilong KPHL i save salim ol ripot bilong kampani i go long Mista Micah.

Long wankain taim, Petromin PNG Holdings Limited i senisim nem bilong em pinis.

Nupela nem bilong Petromin em i Kumul Minerals Holdings Limited (KMHL). Mista Micah i bin lukautim tupela KPHL na KMHL wantaim tasol tupela kampani bai nau go bek gen long KCH.

Kumul lukluk long egrikalsa

SIAMAN bilong Kumul Consolidated Holdings Limited (KCH), Paul Nerau, i tok aut pinis olsem KCH bai lukluk long mekim bisnis long egrikalsa, turisem na piseris.

Dispela em ol bisnis sekta we kantri i gat bikpela sans long mekim moa mani na planti manmeri PNG tu bai gat sans long wok taim KCH i inves long ol dispela ki eria bilong ikonomi.

Mista Nerau i autim dispela toktok long las wik Fonde long Pot Mosbi long ai bilong olgeta siaman, bod memba, menesing dairekta na ol bikpela maus manmeri bilong ol bisnis bilong gavman o Stet on Entaprais (SOE).

Pablik Entaprais na Stet Invesmen Minista, William Duma, tu i bin kam long dispela bung na em i amamas olsem KCH nau i go insait long egrikalsa.

Mista Nerau i tok namba wan invesmen KCH i mekim long egrikalsa em long Sepik Plains Egrikalsa Projek we Praim Minista Peter O’Neill na Minista bilong Treid, Komes na Industri, Richard Maru, i opim long las wik Fonde.

Kampani bilong Israel, Innovative Agro Industries Limited (IAI), i kamap projek patna bilong KCH we tupela kampani bai kirapim bikpela egrikalsa projek long Sepik Plains insait long Yangoru-

Sausia distrik.

“Planti taim yumi save toktok long kirapim egrikalsa sek-ta bilong kantri tasol dispela toktok i no save karim kaikai.

“Mi laik tok tenkyu long Praim Minista Peter O’Neill i luksave long dispela bikpela Sepik Egrikalsa projek, we gavman i gat sea aninit long KCH,” Mista Nerau i tok.

Em i tok aut tu olsem KCH bai putim mani na inves long bisnis bilong turis na bisnis bilong pis.

“Turisem na piseris bisnis em i tupela bikpela industri we gavman i ken mekim moa mani. KCH bai go insait long dispela tupela bisnis sekta na inves,” Mista Nerau i tok.




INVESTMENT TOKTOK wantaim DR. STEPHEN NASH

Kirap wantaim enuel historikel US ikwiti volatiliti

Sapos yu gat askim, plis salim i kam long toktoksuper@nambawansuper.com.pg na mipela bai bekim.

Long dispela taim, Yunaitet Stets ikwiti maket i lukim kirap bilong ikwiti maket i kam isi isi tru, insait long wanpela yia we i winim ol arapela yia bipo, we em i senisim tingting bilong ol prais bilong ol investa. Bikpela enuel ikwiti volatiliti i soim olsem ol investa i gat wari long ol prais bilong wan wan aset olsem dispela S&P 500 ikwiti indeks, na ol mak bilong volatiliti we i daun tumas insait long histori em i soim olsem ol investa i no wari long prais bilong wan wan aset.

Ol ikwiti maket prais em i makim ol lain dividen o win mani bilong longpela taim, we bai mekim o sea prais i soim gutpela piksa bilong gro bilong ikonomi long bihain taim, na volatiliti bilong wanpela sea indeks long histori i soim klia wanem kain tingting long maket i stap strong o sapos no gat, long ol samting we ol i ting i mas kamap. Bikpela volatiliti i soim wanem tingting ol i gat long maket bai stap strong, na narapela sait tu em i tru. Nai, yumi ken lukim olsem, stat long pinis bilong 2014, ol tingting wari bilong ol kain kain hevi i bin wok long go planti, olsem ol ripot bilong enuel volatiliti bilong S&P 500 i soim long piksa daunbilu.



Piksa 1
 Em sampela ol bikpela trabel lain i save mekim ol volatiliti i go antap olsem:

- **Oktober 2014**, US i go pas long tromoi bom long Syria wantaim balus, bungim wantaim ol hevi long Saina we i kamaut long protes long Hong Kong, na bungim gen wantaim ol wari bilong ol US reit i go antap,
- **Desember 2014**, wantaim ol ileksen bilong Greek, hevi wantaim mani bilong Rasia,

- **Ogas 2015**, wantaim tok tenkyu long Saina ikonomi i gro isi, isi,
- **Januari 2016**, wantaim kamap gen bilong pret long ol reit i go antap na pret bilong US maket i pundaun isi isi, na
- **Jun 2016**, pret long UK ikonomi bai go daun isi, isi bikos long Brexit.

Nau, bipo yu tok, “na bai olsem wanem, ol maket em olsem yet, ol i save wari long ol samting olsem”, tasol plis yu mas tingim ol samting we i wok long kamap, we i mekim volatiliti i go antap insait long histori em i kisim bikpela moa volatiliti. Moa klia, em long mekim tok klia long pepa long dispela samting i kamap em i isi tru; ol maket i karim hevi long sampela taim, inap ol i no inap tru long karim dispela hevi moa. I gat wanpela taim we ol maket bai i no inap long wanbel long hevi bilong moa wari. Ol bikpela toktok ol i save toktok olsem long ol literesa na lng narapela hap tu i holim witnes long dispela kain samtingi wok long kamap, long ol kain toktok olsem, “wanpela stro inap brukim baksait bilong kamei”. Nau, dispela em i no bilong tok olsem ol long mekim tok i go pas, olsem US maket i stap long mak bilong dai, na em bai bagarap, na pundaun i no long taim. Lukluk i go bek gen long histori, ol sea prais i ken go antap yet wantaim ikwiti volatiliti. Wanem samting i bin kamap long Mei 1996 long “tech wreck” bilong namel long yia 2000 taim, i soim wanem kain taim bai volatiliti inap long go antap na stap. Tasol, yumi ken lukim olsem dispela taim namel wanpela taim bilong volatiliti i stap daunbilu tru na i go long wanpela mak antap we volatiliti, we ikwiti i go daun, insait long S&P 500 index, em i insait long tupela yia samting. Bikpela samting em dispela taim i ken go bikpela, bikos wan wan ekspirians i narapela kain, long tupela hap bilong tripela long wanpela yia i go long winim tripela yia. Tasol, sapos volatiliti i stap daun em i soim long Septemba 2014 we yumi ken lukim long Piksa 1, na gen tupela yia bihain long dispela deit i bringim wanpela taim arere long Septemba 2016. Long wan wan taim bilong ikwiti volatiliti em i narakain, na, na bai yumi save liklik tasol, na ol data o ripot i soim liklik olsem ikwiti volatiliti i mas stat long go antap insait long Septemba 2016, o US ikwiti i mas stat long pundaun long wankain taim.

Bai yumi ken tok olsem, nau yet ol ikwiti maket i wok long harim ol wari gut, na ol i wok long sakim bel kirap long senisim ol ekspektesen, bilong wanpela “bullish” tingting i go long wanpela moa “bearish” tingting. Samting tru em wanem samting yumi tok long en antap, em olem bai i gat ol limitesen o mak long wanbel long bel wari bilong ikwiti maket, nogut i gat wanpela mak bilong wari i kam yet. Lukluk i go pas, em i gat planti samting i stap redi long taim tebol we inap long mekim ikwiti volatiliti, long enuel historikel ikwiti volatiliti, wantaim pundaun bilong US ikwiti prais. Ol dispela samting we bai kirapim dispela samting em olsem:

- Sapos US ileksen i no kamap olsem ol man i redi long en,
- Sapos ol toktok bilong Brexit negosiesen wantaim strongpela moa Brexit i kamap,
- Sapos i gat moa hevi wantiam Yuropien benk i fosim wanpela rekapitalisesen bilong wanpela o moa long kamap.
- Sapos prais bilong oil i pundaun moa,
- Sapos narapela Yuropien kantri i laik kamaut long Yuropien Yunien, o
- Sapos wanpela pasin bilong pasim ol US mani polisi i kamap.

Em bai gutpela sapos, US maket bai go het yet long “strongim i go”, tasol ating ol hevi we i stap long Yurop na Esia, wantaim liklik gro tasol wantaim ol narapela hevi tu, no gut bai i go tu long US. Olsem yumi lukim long antap, i gat planti samting we inap long kirapim ol samting we i stap ples klia pinis, long gutpela tingting bai pundaun, bihain long volatiliti i go antap longpela taim tumas. US maket em i bikpela maket we i save holim global ikwiti indeks, yumi tingting tasol olsem US maket bai inap long stopim global ikwiti prais long no ken pundaun inap long wanem taim.

Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

BIGGER, BETTER, SAFER,
STRONGER AND STILL NUMBER 1



Ramu NiCo givim trening long 60 rural Begezin fama



Grup poto bilong ol lain stap long Wekmara pik na kakaruk menesmen trening.

OL RURAL fama long Sumao-Garia wod 19 long Usino LLG long Usino-Bundi distrik long Madang provins i givim bikpela tok amamas tru long Ramu NiCo Menesmen (MCC) las wik Fraide long salim ol wokman bilong em long go givim menesmen trening long ol long lukautim pik na kakaruk.

Ol 60 rural fama bilong dispela eria long Begezin long Sumao-Garia i bin stap insait long dispela 2-pela wik treining we i bin stat long July 17 na pinis long Julai 29.

Ol Ramu NiCo Komyuniti Afes (CA) Dipatmen opisa olsem Allan Wahwah, Aldam Bande na tupela strongpela fil opisa Seth Winn wantaim Samuel Masawa i bin stap wantaim ol lain komyuniti long ples Uria long ronim dispela trening long bisnis menesmen.

Dispela trening em Thomas Ekik bilong Wekmara Poltri Projek i bin oge-naisim long helpim ol pipel bilong em long Wekmara na Sumao-Garia wod 19 long ol i ken lukautim gut kakaruk na pik na salim na menesim bisnis bilong dispela wok long helpim sindaun bilong ol long rurel viles bilong ol na lukim ol i ken kisim mani long stretim sindaun.

Long las wik Fraide, Julai 29, ol dispela 60-pela lain husat i bin stap insait long dispela pigeri na poltri menesmen trening em ol Ramu NiCo opisa i givim i bin kisim setifiket pepa. Dispela pepa i soim olsem ol i lainim samting na luksave i kam long Madang Dipatmen ov Agrikalsa na Laipstok (DAL) na tu long Ramu NiCo Menesmen (MCC).

Vais Presiden bilong Ramu NiCo (MCC), Wang Baowen i lusim bikpela opis bilong em long Madang na ran long kar i go olgeta antap long Sumao maunten na kamap long ples Uria long lukim greduesin bilong 60 lain husat i stap long dispela bisnis menesmen trening long lukautim pik na kakaruk.

Mista Wang i bin go wantaim Ramu NiCo CA Deputy Jeneral Menesa, Yuan Zhi na ol wokman meri bilong CA Dipatmen.

Mista Wang i amamas long gutpela welkam ol lain long ples Uria i givim long em wantaim ol tim bilong em, na em i tokaut olsem Ramu NiCo Projek i amamas long wok-bung wantaim ol lokal komyuniti insait long Ramu Projek eria. Em i tok ol pipel mas sanap strong na wok hat long graun na groim kaikai na wokim bisnis na bringim

senis i go insait long wan wan famili na komuyuniti bilong ol. Taim gutpela senis i kamap ol pikininini na tum-buna long bihain taim bai bungim gutpela sindaun na bai amamas gut.

Wanpela lokal bisnisman bilong Usino-Bundi, Edward Kiza tu i bin stap long dispela seremoni long las wik Fraide na i givim tok amamas bilong em long ol pipel bilong Sumao-Garia wod 19 na givim salens long ol long sanap strong na wokim bisnis long bringim senis long viles na distrik bilong ol.

Deputi Siaman bilong Inlen Paipain (Maigari) Lenona Asoresin, John Kotty i givim tok amamas bilong em long Ramu NiCo long givim tok-orait long ol CA wokman bilong em long go stap wantaim ol rurel komyuniti long Sumao-Garia wod 19 long givim trening.

Mista Kotty i tok amamas long Ramu NiCo long luksave em i save gat long ol rurel pipel insait long projek eria bilong en na save givim wanem kain liklik helpim na sapot i go long ol.

Vais Presiden bilong Usino LLG, kaunsila Sirax Kawake tu i bin stap long dispela seremoni long las wik Fraide, na i bin givim naispela ol toktok na salens i go long ol pipel bi-

long Sumao-Garia long pasin bilong wok.

Wanpela long ol meri husat i bin stap long treningm Eileen Tatak i givim bikpela tok amamas long ol lain i givim trening olsem Samuel Masawa, Seth Winn na Aldam Bande.

Eileen i tok em i lainim planti gutpela samting long trening we em i bilip dispela ol infomesin na skul em i kisim bai helpim em long ronim gut projek bilong em long ples.

"Dispela trening i givim strong long mi long wokim liklik bisnis long sapotim famili na komyuniti bilong mi," Eileen i tok.

Ol lain bilong Madang Provinsal Gavman aninit long Projek Menesmen Yunit tu I bin stap long givim toktok na laikim moa wok bung I kamap wantaim Ramu NiCo long helpim ol komyuniti long Mang.

Ol lain blong Wekmara Projek i amamas na givim wanpela pik na ol gaden kaikai i go long ol hatwok CA opisa wantaim VP Wang Baowen long karim i go long Madang. Dispela bikpela pik em CA Suprintenden long, Jacky Wang i karim i go antap long KBK long kilim na serim wantaim ol lain bilong em.




VP Wang Baowen givim setifiket long wanpela man husat i stap long trening.



Wanpela komyuniti lida bilong Uria givim present long VP Wang Baowen na Mista Yuan Zhi.



Ol lain bilong Wekmara Poltri projek givim pik na kaikai long Ramu NiCo (MCC) lain long tok tenkyu na soim pasin.



Tim PNG i go kamap long Rio

TIM PNG i go long resis long Olimpik Gems i go kamap long Rio na go insait long Gems Viles.

Bipo, ol i bin luksave long sampela liklik toktok long Gems Viles, tasol nau ol i ringim olgeta tim long olgeta hap bilong wol na wan wan etlit bilong ol i go kamap long hap bilong pilai long stat resis aninit long Olimpik driman bilong ol.

Insait long ol rum bilong Tim PNG, ol i kisim sampela amamas skul toktok long ol sumatin bilong wan wan skul long PNG we ol i bin putim antap long wol na toksave long ol etlit gen olsem i gat bikpela sapot i stap long PNG.

Tupela PNG etlit husat i go kamap pas long Rio em Raymond Ovinou, husat bai

resis long Judo na Thadius Katua bai resis long boksen. Tupela i go stret long trening sesen bilong tupela long trening hap bilong Gems.

Katua i gat wanpela taim long pait egensim boksa bilong Thailand long las wik Fraide olsem trening pait bilong em. Kosa bilong em, Allan Nicolson na Joe Aufa, i tok, kala bilong Katua egensim ekspirians boksa i kamap namba wan long dispela trening pait.

Katua bai resis long Ogas 6, wanpela de bihain long opening seremoni bilong Gems.

Ovinou i lukluk tu long resis na em i bihainim gut wan wan de trening taim bilong em na trening strong long ol taim i stap yet.

Tupela etlit wantaim i

lukautim gut weit bilong tupela bipo long resis na tupela i no klaikai planti long ol kaikai ol givim long Gems Viles.

Tupela i ken luksave long ol narapela samting we Gems Viles i givim fri sevis em poliklinik wantaim fri dentistri na optometris, gutpela hap bilong stap long ol fri taim, swimming pul, ea salon na ol narapela samting moa.

Ol narapela etlit bilong Tim PNG i go joinim tupela bihain. Ol i go pas na stap wantaim long opisal Gems Viles welkam seremoni bilong Tim PNG bai kamap tude.

Tim PNG bai joinim ol narapela 206 kantri bai resis long Rio Olimpik long taim bilong Gems Opening Seremoni bai kamap long Ogas 6, 2016.



Rio 2016 Gems Viles.



Tim PNG grup Husat i lusim Pot Mosbi long las wik Trinde i bin go kamap long Rio. Ol i bungim Sef de Misin bilong Tim PNG, Emma Waiwai, na Jenerel Tim Menesmen na i go insait long Gems Viles.



Tim PNG i lusim Pot Mosbi long las wik Trinde.



Tim PNG i go kamap long Australia.

Besta FA Kap salens i stat

BIKPELA rijonal futbol gem long kantri i stat wantaim top lokal futbol tim bai kamap namba wan long rijon.

Intenesenel Futbol Kopresen (IFC) i sponsa long Besta FA Kap salens we ol bai pilai long 4-pela rijon bilong kantri.

Salens long Momase bai statim resis long Madang long 10 Ogas i go inap long 13 Ogas long Laiwaden pilai graun.

Ol tim husat bai resis long Momase salens em Lahi (man na meri tim), LFA (man na meri tim), Wau (man na meri tim), Maprik man tim, Van-

imo Urban man tim na Ramu Sugar (man na meri tim).

Foapela de bihain long Momase salens, ol bai statim Sauten lek long 17 Ogas i go inap long 20 Ogas. Sentrel Koupa Soka Asosiesen (KSA) bilong Rigo bai go pas long dispela salens.

Sauten Rijon Besta Kap salens bai kamap 9insait long 4-pela de na 7-pela tim bai kamap long Koupa Soka Asosiesen na ol narapela tim bai kamap long NCD Pablik Sevent Soka Asosiesen, Pot Mosbi Soka Asosiesen, Higaturu Soka Asosiesen long Oro, Tabubil Soka Asosiesen long Westen, Hekari Soka

Asosiesen long SHP, na Loa Sogeri Soka Asosiesen long Sentrel.

Tupela narapela rijon bai stat long wan wan hap bilong tupela yet.

Hailans Rijon bai kamapim pilai long Kundiawa long Simbu provins long 24 Ogas i go inap long 27 Ogas.

Niugini Ailan sempionsip em ol bai pilai long Arawa long Otonomas Rijon bilong Bogenvil long 25 Ogas i go inap long 28 Ogas.

Resis menesa bilong PNGFA, Simon Koim, i laikim olgeta asosiesen husat bai resis i mas i gat man na meri tim wantaim.

POM kriket i go long fainel

DULUX United i go het long top fom bilong ol long premia divisin bilong ol man long Intenesenel Trening Institut (ITI) Pot Mosbi Kriket Asosiesen resis. United i daunim ol Big Roosters Kempa wantaim 87 ran long las wiken.

Unaited i pait pas na setim taget long 177 long win bihain long betim aut 20 ova. Kempa i no gat inap ran na ol i bowlim i go aut long 90 ran long fainel ova bilong resis.

United i stap namba wan ples long lata yet wantaim 12 win long 15 gem ol i bin pilai. Nau ol i pinisim olgeta raun na ol bai go insait long ol fainel.

Top 6 tim bilong premia divisin bilong ol man em;

- 1 Dulux United,
- 2 Pacific MMI Coasters,
- 3 Swire Shipping Hoods,

- 4 IBS Poreporena,
- 5 Pure Water Raukele na,
- 6 Big Rooster Kempa.

Long risev gret divisin bilong ol man em;

- 1 Swire Shipping Hoods,
- 2 IBS Poreporena,
- 3 Dulux United,
- 4 JND Imanakone,
- 5 Pure Water na,
- 6 Badili Hardware Wanderers.

Long divisin bilong ol meri em;

- 1 Swire Shipping Hoods,
- 2 Dulux United,
- 3 IBS Poreporena,
- 4 Pacific MMI Coasters,
- 5 IBS Logohu na,
- 6 KCC

Marum i kosa bilong Kumuls long Wol Kap resis



(L-R) Kosa bilong Australia, Mal Meninga, Kepten bilong Australia, Cameron Smith, Skipa bilong Nu Silan, Jesse Bromwich, kosa bilong Nusilan, Stephen Kearney, Kepten bilong PNG LNG Kumuls, David Mead, na kosa bilong PNG LNG Kumuls, Michael Marum i sanap bung wantaim long taim ol i bin toksave long dro bilong Wol Kap long Brisbane.

KOSA bilong PNG LNG Kumuls, Michael Marum, i strongim long kamap kosa bilong nesanel ragbi lig tim long resis long 2017 Ragbi Lig Wol Kap.

Siaman bilong PNG Ragbi Futbal Lig (PNGRFL), Sandis Tsaka, i tok, ol i bin makim Marum long taim PNGRFL i bung.

Em i tok, Marum i gat ekspirians bihain long ol Kumuls i win egensim ol Fiji long Pasifik Tes resis long Sydney long may.

“Dispela win i kisim PNG i go long namba 11 ples long wol renk we bipo ol i bin stap long 14 ples na dispela i soim olsem em i orait long stat mekim wok redi long lukautim nesanel tim long resis long Wol Kap long yia i kam,” Tsaka i tok.

“Marum i gat gutpela

rekot long kamap kosa bilong ragbi lig, na ol sapota na pilaia i save rispektim em long wok bilong em. Long dispela astingting, mipela i gat bikpela bilip long em long givim namba wan skul toktok long ol pilaia long kamapim ol risal we mipela i laikim na sainim kala bilong mipela long wol renk,”

Em i go het na tok klia olsem ol i bin makim Marum long kamap kosa em i kamap strong nau na em bai stap inap long mun Oktoba 31, 2018.

“Mi gat bikpela amamas long ol Bod i strongim olsem ol i bin makim mi long kamap kosa na nau mi bai stat long mekim wok redi long dispela bikpela invent,” Marum i tok.

“Mi tok tenkyu long Bod bilong PNGRFL long ol i gat strongpela bilip yet long mi

long lukautim PNG LNG Kumuls i go insait long Wol Kap long yia i kam.

“Wantaim tripela gem ol bai pilai long Kantri, em i bikpela salens, tasol mipela bai stat redi nau long pilai gut long graun bilong mipela.”

Marum i laikim ol pilai husat i pilai nau long NRL, Inglis Supa Lig, NSW na Kwinslan Kap resis i mas go het na pilai bikos ol bai lukluk gut long makim ol pilaia.

Ol i bin tokaut long Marum long taim em i go long arim toksave bilong Wol Kap dro long Brisbane wantaim kepten bilong PNG LNG Kumul, David Mead, Kosa bilong Australia, Mal Meninga, Kepten bilong Australia, Cameron Smith, na kosa bilong Nu Silan, Stephen Kearney na skipa, Jesse Bromwich.

Marum i skruim taim long stap kosa bilong Hunters

KOSA bilong SP PNG Hunters, Michael Marum, i skruim taim bilong em olsem kosa bilong Hunters inap long pinis bilong 2018 sisen bilong Intras Supa Kap resis.

Siaman bilong PNG Ragbi Futbal Lig, Sandis Tsaka, i tok, kontrak bilong Marum i ken pinis bihain long pinis bilong dispela sisen.

“Mi gat bikpela amamas long tokaut olsem Michael i tok orait long go het na mekim wok bilong em olsem kosa bilong SP Hunters inap long mun Oktoba 31, 2018,” Tsaka i tok.

Marum i tok, em i gat

bikpela amamas long ol i opim rot bilong bihain taim bilong em na nau em i tok long lukluk long ol strong bilong em long lukautim ol Hunters i go moa long narapela lek mak long dispela yia long Kwinslan Intras Supa Kap resis.

“Dispela em i mak we mipela i laik winim na mi ting olsem olgeta lain i gat wankain tingting olsem mi i gat, tasol mipela i ken strong bilong mipela long winim dispela mak. Mipela i mas no ken kisim sampela bikpela bagarap o lusim fom bilong ol pilaia long winim dispela driman,” Marum i tok.

Marum i bin stap kosa bilong Hunters inap long taim ol i bin go insait long Intras Supa Kap resis long yia 2014.

Long dispela namba wan yia, ol Hunters i no bin go insait long top 5 wantaim wanpela poin. Tasol, long yia i go, Hunters i pinisim namba tu bihain long propa sisen na Ol maina premia, Ipswich Jets i daunim ol long prilemineri fainel.

“Marum bai kamapim gutpela tim bilong ol sapota bilong SP Hunters na PNG LNG Kumuls long karim aut program long gutpela rot,” Tsaka i tok.

Raun 16 i pinis: Ol i makim top 5 tim bilong Digicel Kap

TOP faiv tim bilong fainel bilong 2016 Digicel Kap resis em ol i bin makim pinis bihain long raun namba 16 resis i bin kamap long las wiken.

Long raun 16 resis bilong Digicel Kap, PRK Mendi Muruks i bin daunim ol Kemele Hela Wigmen, 14-11, na Waghi Tumbe i daunim EPG Enga Mioks, 20-0.

Pilai i kamap long Goroka em ol PRK Galp Isapea i daunim ol Bintangor Goroka Lahanis, 14-12, long asples bilong ol.

Snax Lae Tigers i bin kisim strong long asples bilong ol na daunim ol TNA Simbu Lions, 22-8.

Agmark Rabaul Gurias i daunim ol SNS Pot Mosbi Vipers long Nesanel Futbal Stediam long las Sarere na Wamp NGA Mt.Hagen Eagles i stap sambai long raun 16.

Snax Lae Tigers i kamap maina premia bihain long dispela sisen bihain long ol i stap long top wantaim 27 poin long resis poin lata.

Ol top 5 tim em;

- 1 Snax Lae Tigers wantaim 27 poin,
- 2 Wamp NGA Mt. Hagen Eagles wantaim 25 pion,
- 3 EGP Enga Mioks wantaim 23 poin,
- 4 Agmark Rabaul Gurias wantaim 22 poin na,
- 5 PRK Galp Isapea wantaim 19 poin.

Fainel bilong Digicel Kap bai stat long Ogas 14, 2016. Tigers bai stap sambai long namba wan gem bilong finel resis taim Eagles bai pilai egensim ol mioks na Gurias bai pilai egensim ol Isapea.



Snax Lae Tigers i amamas long ol i bin daunim ol SNS Pot Mosbi Vipers, 48-0, long raun namba tu long Lae ragbi lig pilai graun, Morobe.

Warriors i winim Alotau ragbi resis

WARRIORS i kamap sempion bilong Alotau Ragbi Lig 9's, husat i pinisim dispela sisen wantaim stail kala long Habona Gage Sten long Alice Wedega Park.

Ol i bin givim K2,000 prais mani long ol Warriors we Nesanel Plening Minista na Memba bilong Alotau, Charles Abel, i givim dispela mani.

Warriors i bin stap pas wantaim 18-10 long namba wan hap bilong resis we pilaia husat i kamap namba wan pilaia long resis, Mo Sina, i putim tripela trai wantaim i no gat wanpela kik bilong ol i abrus, nogat.

Birua tim, Goilanai, i ran wantaim ol trai we kik bilong ol i no go insait.

Ol wok man bilong Nu Briten Pam Oel na ol lain husat i save stap wantaim ol i kamapim tim Goilanai na i strong long kamap wina.

Tasol, klostu long pinis bilong resis, Warriors i soim olsem ol i strong tumas na daunim ol Goilanai wantaim 26-14 poin long winim Alotau Ragbi Lig 9's resis.

Warriors i kisim K2,000 taim ol Goilanai i kisim K1,000 long ol i kamap namba tu long resis. Sina i kamap namba wan pilaia na i kisim K500.

Taun meya bilong Alotau, Gita Elliot, i tok, Alotau LLG i sapotim dispela resis na givim K1,000 long Alotau Ragbi Lig Asosiesen.

Long wankain taim, kodineta bilong Alotau Ragbi Lig 9's, Sipi Waikaidi, i tok tenkyu long ol 22 pilaia long kisim Tim Milen Bei i go long PNG Gems long mun Novemba.

Planti ol pilaia bilong Warriors i bin winim mak na go insait long Milen Bei Ragbi 9's tim.

Hunters i stap yet long namba tri ples

PAPUA Niugini SP Hunters i holim strong namba tri ples long lata bilong intras Supa Kap resis.

Mak long 19 gem ol i pilai pinis, Hunters i kisim 30 resis poin we ol i bin winim 13 gem, lus long 6-pela gem na stap sambai long 2-pela gem.

Hunters i no save lus long asples gem na nau ol bai pilai egensim tim husat i stap namba wan long lata, Burleigh Bears, long Nesanel Futbal Stediam long Sande.

Ol top 6 tim em;

- 1 Burleigh Bears wantaim 33 poin,
- 2 Redcliffe Dolphins wantaim 32 poin,
- 3 SP Hunters wantaim 30 poin,
- 4 Townsville Blackhawks wantaim 29 poin,
- 5 Easts Tigers wantaim 26 poin na,
- 6 Sunshine Coast Fas Icons wantaim 23 poin.



ISI YA: Tripela pilaia bilong Rabaul Guria i stopim pilaia bilong Vipers long brukim banis bilong ol taim ol bung long Digicel Kap resis long Mosbi. Guria i win 16-12.



LUSIM MI: Namba 9 bilong Guria i traim long abrusim pilaia bilong Vipers long Sarere taim ol pilai long Mosbi olem ketenresa.



MI TRAIM BANIS: Namba wan bilong SP Hunters Bland Abavu, i traim banis bilong Ipswich Jet taim ol bung long wiken long Mosbi.



LUSIM MI YA: Brandy Peter bilong SP Hunters i brukim banis bilong Jets. Em i pilaim 50 gem bilong em.



YU NO INAP: Timothy Lomai i traim long pusim pilaia bilong Ipswich Jets. Hunters i winim Jets 18-16 long bekim dinau.

Oi Poto: Nicky Bernard

PNG POWER Ltd **STAP SEIF WANTAIM ILEKRISITI**

STOP

YU NO KEN HOLIM WANPELA PAWA LAIN WE I PUNDAUN LONG GRAUN! EM I GAT BIRUA I STAP NA INAP LONG KILIM YU I DAI.


LUKAUT LONG OL PAWA LAIN ANTAP TAIM YU MEKIM WOK ANINIT LONG OL.

NO KEN GO ANTAP LONG OL PAWA POS NA OL BIKPELA PAWA PAILON WE I KARIM OL LAIP WAIA. EM I NO SEIF.

NO KEN YUSIM OL HAP AIN LONG RAUSIM OL PRUT LONG OL DIWAI I STAP KLOSTU LONG OL PAWA LAIN. ILEKRISITI INAP LONG KILIM YU SAPOS YU GO KLOSTU TUMAS O HAP AIN YU HOLIM I TASIM PAWA LAIN.

NOKEN LARIM DIWAI I GRO ANTAP OL PAWA LAIN

Plis yu mas givim olgeta ripot bilong ol hevi bilong pawa lain i go long Nesenel Kol Senta long telepon namba: 70908000, 76535261 o 76535272.
Email: callcentre@pngpower.com.pg.



DIANA Tuna

Niupela Swit Teist
Nau Igat Moa Oil!



PNG's ORIGINAL TUNA

PNG MADE Manufactured by:
RD TUNA CANNERS LTD.

NCDC bai sapatim POM Vipers wantaim K1 m

HONK Kiap, Deputi Siti Menesa bilong Sosev Sevis long NCDC, i tokaut long dispela wik olsem POM Vipers Rugby Lig Klap em i stap yet olsem samting bilong NCDC na Stop N Shop.

Em i tok NCDC i lukim olsem Vipers tim i bilong ol pipel bilong Pot Mosbi na NCDC em i stap lukautim olsem provinsal gavman bilong siti.

"Mipela laik strongim dispela sapat bilong mipela wantaim K1 milien sponsasip long POM Vipers Ragbi Lig Klap winim K400,000 bilong dispela yia.

"Ol memba bilong Pot Mosbi Ragbi Lig Klap (PRL) i wok long traime kisim Pot Mosbi Vipers Ragbi Lig Klap olsem em i samting bilong ol. Pastaim long mipela i putim toktok long midia, mipela i bin askim Pot Mosbi Ragbi Lig Klap long putim tupela man long bod bilong Pom Vipers.

"Tasol mipela i no bin laik toktok planti long dispela tasol ol i no laik long kam insait long bod. Mipela i bin pasim i stap. Mipela bin askim ol PRL Club long kam insait long bod bilong POM Vipers tasol ol i no bin laikim.

"Mipela olsem ol franchise papa bilong klap, NCDC na Stop n Shop i stap yet olsem papa bilong POM Vipers Ragbi Lig Klap. Mi no save ol

POM Ragbi Lig Klap i kam aninit long wanem lo o konstitusen long toktok.

"Mipela bilip olsem POM RL Klap i no stap baksait long dispela kain toktok tasol i gat sampela lain husat i gat laik bilong ol yet long mekim dispela."

Tasol PRL i bin tok strong yet olsem Vipers em i bilong POMRFL na i no propeti bilong ol sponsa.

Ol i tok SP Brewery i sponsa bilong Port Moresby Rugby Football League na em i no papa bilong en. Ol i tok Vipers i bilong POMRFL long 1988 i kam inap nau na sapos ol sponsa i laik kam insait em i orait, tasol ol i no inap kamap papa bilong bren nem Vipers.

Mista Honk i tok moa yet olsem ol i bin askim POM Vipers Ragbi Lig Klap long hom graun tasol POM RL Klap i no laik long larim ol olsem na ol i toktok wantaim PNG Spots Faundesen long kisim pilai graun bilong Sir John Guise Stadium i kamap olsem hom graun bilong POM Vipers Ragbi Lig Klap.

"Mipela i laikim POM Vipers Ragbi Lig bai kamap premia ragbi lig klap we ol pipel bilong Pot Mosbi bai amamas long dispela tim gen

olsem bipo.

"Mipela bai singautim ol memba bilong Sentral Provinsal Gavman, Motu Koitabu Kaunsil, memba bilong ol setelmen kompetisen, ol bisnis haus na Pot Mosbi Komyuniti long kam insait long Pot Mosbi Vipers Ragbi Lig Klap bod."

NCDC nau i laik apim nem bilong Pot Mosbi Vipers Ragbi Lig Klap i go long biknem premia klap olsem em i bin gat long bipo.



Mista Honk Kiap – Deputi Siti Menesa, Sosev Sevis i sindaun wantaim ol Bod Memba bilong POM Vipers Ragbi Lig Klap.
Poto: Nicky Bernard.



Strongpela Marasin Bilong Kus Gutpela Prais!

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg